



懷寧縣志卷十七

忠義

士君子遭時不幸致命遂志而已豈利屈以每其生哉此卷所書諸人或死於當官或死於拒敵彼誠獲死所亦各以其時焉左兵之變布衣閭巷之士陷胸隕脰至不可勝數舊志所載者鈔蓋其謹也清初死事以及咸豐間陣亡兵弁守義士夫矜卹之典未可遺也謹卽採得者備錄焉

末漢吳王蕃字永元廬江人也

張楷府志列於宿松未知何據

博覽多聞兼通

術藝

傳劉洪乾象歷制渾儀舊以二分爲一度患星辰太稠張衡改用四分復傳重難運蓄改以三分爲一度因著論考

度後沈約采爲天文志本府志

始爲尙書郎去官孫休卽位與賀邵薛瑩虞汜

俱爲散騎中常侍皆加駙馬都尉時論清之遣使至蜀蜀人稱焉還爲夏口監軍孫皓初復入爲常侍與萬彧同官彧與皓有舊俗士挾侵謂蕃自輕又中書丞陳聲皓之嬖臣數譖毀蕃蕃體氣高亮不能承顏順旨時或迂意積以見責甘露二年丁忠使晉還皓大會羣臣蕃沈醉頓伏皓疑而不悅舉蕃出外頃之請還酒亦不解蕃性有威嚴行止自若皓大怒呵左右於殿下斬之衛將軍滕牧征西將軍留平請不能得

江表傳曰皓用巫史之言謂建業宮

不利乃西巡武昌仍有遷都之意恐羣臣不從乃大請會賜將吏問蕃射不主皮爲力不同科其義云何蕃思維未答卽於殿上斬蕃出登來山使親近將跳蕃首作虎跳狼爭咋齧丞相陸之頭皆碎壞欲以示威使衆不敢犯也此與本傳不同

凱上疏曰常侍王蕃黃中通理知天知物處朝忠蹇斯社稷之

重鎮大吳之龍逢也昔事景皇納言左右景皇欽嘉歎爲異倫而陛下忿其苦辭惡其直對臬之殿堂尸骸暴棄郡內傷心有

識悲悼其痛蕃如此蕃死時年三十九

據三國志吳書補

元陳道夫懷寧人余闕守安慶得便宜辟道夫爲懷寧尹撫綏有方時敵攻城勢急闕欲自殺道夫曰忠臣當死於敵徒死何名今力尙未窮宜與公死守幸一戰而勝則可以保全江淮矣遂屢却強敵城陷與闕同死之祀鄉賢

明甘霖洪武丁卯舉人建文時官御史剛介敢言靖難兵入霖被逮不屈從容就戮子孫相戒不復仕福王時追諡貞定贈官太僕寺卿清乾隆三十九年纂修勝朝殉節錄改諡節愍撰文

致祭祀鄉賢

汪鑾軀幹修偉有健力正德己卯宸濠擁衆攻城北鑾遇賊被執脇令諭城中出降鑾至城下大呼曰王師已破南昌賊困極將遁可堅守厲罵不屈賊怒解其屍賊退後一犬常守護之見者知係鑾犬因知爲鑾之屍也有司狀聞詔旌其門舊宅在集賢門外南莊嶺

張澤字大被一字義甫

張府志作桐城人舊縣志李府志及通志俱作懷寧人

嘉靖間拔

貢授湖廣沅江知縣以能擢浙江衢州通判方漑任初概取通賦拘繫者釋之而民以感泣爭輸時督府胡宗憲威傾浙東西每屆出行前驅邀索無厭守令皆奉之惟謹莫敢誰何澤獨縛

杖前驅督府爲之氣懾卒未有以難也尋移廣安知州出冤濫五十餘人政聲益著特晉雲南僉事分巡安普值叛酋鳳繼祖糾衆攻武定新城澤督尋甸兵二千餘人馳往救之遇伏而敗與千戶劉裕俱被執而鎮巡官益趣諸道兵竝進逼東山賊寨圍之急繼祖乃大懼乘閒挾澤走照姑欲得澤手書移軍門以爲解澤叱曰吾天朝大臣肯爲賊作說客耶遂死之事聞贈光祿寺少卿賜廟額忠節廕一子祀鄉賢

王來聘

明史京師人按來聘懷寧人見舊府縣志

崇禎四年中武會試時帝銳意重

武舉子運百斤大刀者止來聘及徐彥琦二人而彥琦不與選帝下考官及監試御史獄悉貶兵部郎二十二入遣詞臣倪元

璫等覆閱取百人視文榜例分三甲傳臚錫宴以前三十卷進呈欽定一甲三人來聘居首卽授副總兵武榜有狀元自來聘始也來聘既拜命泣然流涕曰上重武若此欲吾儕効命疆場爾不捐軀殺賊何以報上恩明年孔有德據登州叛官軍攻之久不下又明年二月以火藥轟城城壞將士踊入輒爲賊擊退來聘復先登中傷而死天子惜之贈廕有加以上明史本傳清乾隆間修勝朝殉節錄賜諡忠愍

江襟楚字雲渚泰昌元年以恩薦授江西興安知縣稱幹吏轉廣東瓊州通判申備海防蚤不爲寇無何病篤解組歸崇禎丁丑遇流賊被執不屈大罵截舌死

阮之鈿字實甫貢生

舊府縣志及通志俱作懷寧人無爲汪有典史外亦爲懷寧明史誤作桐城崇

禎中下詔保舉人才同邑

明史彙本作邑字明史改郡字

諭德劉若宰以之鈿

應授穀城知縣十一年正月之鈿未至張獻忠襲陷其城據以求撫總理熊文燦許之處其衆數萬於四郊居民洶洶欲竄之鈿至盡心調劑民稍安乃上疏言微臣辦賊有心受事無地獻忠虎踞邑城其謀叵測所要求之地實兵餉取道咽喉秦蜀交會脈絡今已皆爲所據而奸民甘心效用善良悉爲迫脇臣守土牧民之官至無土可守無民可牧庫藏殫虛民產被奪無賦可徵名雖縣令實贅員爾聞今廟堂之上專主撫議臣愚妄謂撫勦二策可合言未可分言致損國威而挫士氣也

舊志之鈿疏云穀城

當襄陽上游被賊蹂躪已極然孤城尚在死守可延臣細詢賊情知羣寇盤連穀境賊首張獻忠虎踞縣城狼心未洗正爲兵餉不足意欲積粟狼戾時不能用賊衆始稍相安後漸出野外待時而發與本傳異

行劫之鉅執之以告其營將初少寘之法已而往告皆不應曰

官司不給餉爾得餉自止由是村民徙亡殆盡遂掠及闔閭稍

拒輒挺刃相向日有死者一城大囂監軍僉事張大經奉文燦

令來鎮撫亦不能禁舊志又云之鉅至任左右胥徒無一非賊

設備文燦見書揮之不答與毛奇齡後明年獻忠反形漸萌之

鉅往說之曰將軍始所爲甚悖今幸得爲王臣當從軍立功垂

名竹帛且不見劉將軍國能乎天子手詔進官厚賚金帛此赤

誠效也將軍若疑中朝有異論者之鉅請以百口保於朝何嫌

何疑而復懷他志哉舊志無說獻忠素銜之鉅遂惡言極罵之

之鉅憂憤成疾題數語於壁舊志之鉅刺血題壁云讀盡古聖

仁不愧賢自誓以死遂不視事至五月獻忠果反劫庫縱囚毀

其城之鉅仰藥未絕獻忠遣使索印堅不予賊遂殺之旋縱火

焚公署骸骨爲燼之鉅後贈尙寶少卿明史本傳

劉守中字禹中崇禎間以歲貢授涇縣訓導日與諸生講授經

學乙酉五月聞金陵陷知縣王先甲遁去縣人士推守中署縣

篆八月清兵至涇縣城破守中懷印赴茂對亭池中死

孟振邦字維新安慶衛人都督同知孟政後也洪武初政以戰

功授世職傳九世振邦襲已乞休歸養矣中丞史可法強之出

視衛篆以轉運奏最擢浙江都司謝職歸時皖方戒嚴復擢振邦參將備城守左兵陷城振邦死之月餘始得屍顏邑如生子命世輔世安世別有傳

張應奎字聚明諸生少讓產於兄獨任孝養典衣變產以奉甘旨性好學年七十猶讀書不輟所著有大衍圖邵子園中圖解西銘說諸書左兵陷城義憤不屈死學者私諡曰貞介先生

段志

及府志  
理學傳

子炎字瑜珩亦諸生積學善屬文詩古文多奇逸之作

金應臚鄉飲大賓鎮之子也官遊擊謝病居安慶乙卯左兵之變躬率團勇協力守城奮勇巷戰受矢傷被圍莫出長子廷重與弟廷琛廷瑄暨子士毅奮勇救護廷琛廷瑄士毅俱陣亡廷

重被焚死明倫堂舊有一門烈孝匾額

補

胡士恂諸生幼孤育於大父性至孝力學尤邃於易左兵陷城慷慨罵賊死妻張氏赴水以殉二子再寅紹虞俱諸生再寅悲憤不食死紹虞妻蔣氏亦自縊陳尙炳亦罵賊死妻何氏賊欲挾之去因奮投橋下賊恚甚交鋒刺殺之何霖諸生城潰被執罵賊櫻怒刺及尤慘方應旂亦諸生避賊寶善巷被執賊命之跪應旂怒罵曰我書生肯跪汝賊奴耶賊故笑而釋之隨命一小兵刺其喉而斃

生員阮之鈺字韜甫左兵破城因母崔氏老病未避及賊至爲母請命不許以身代死又不許遂挺身障母皆被重創母立仆

地之鈺強起罵賊格鬪不支而死

生員蔣奕芝字鍾韓左兵破城見賊欲殺其母以身覆之屢受賊刃遂死於母臂上賊為感動母始得全

生員黃淡字元味左兵破城見母徐氏為叛卒所執逼獻金銀無出賊將殺母急以身庇奪刀抗賊被賊衆擒殺噴血罵賊而死兄中通中德俱生員亦皆因鬪賊被殺

夏繼春明經蓮如子當流寇之亂祖母張氏為賊所執繼春隨父奔救賊渠勒以金贖又設計脫父賊因移營將殺張氏繼春抱張項不釋遂殺繼春棄張而去時張年八十

王廷綬左兵破城因病未避賊至索金不厭被賊殺害

孟振邦左兵破城與妻崔氏同時殉難

周某文典之父左兵破城與妻何氏同時殉難

小吏房甲崇禎乙亥流賊猝至被殺詳節烈房陳氏傳內

程翔雲之子明季流寇至與母同時遇害詳節烈程胡氏傳內

董傳鍾崇禎十年慘遭賊害詳節烈董喻氏傳內

鄧久中之二子明季流寇至各偕其妻殉難詳府志節婦鄧潘氏傳內

鄭素居智勇過人崇禎十四年流賊猖獗入室與之力鬪受十

餘傷死幼子俊亦被焚死詳貞女鄭福貞傳內

葉兆魁生員葉寵光子明季流寇掠境因救孀母龔氏被殺妻

徐氏與子震昌亦同遇害詳節婦葉龔氏傳內



戴宗燦戴堯封子左兵破城隨母劉氏赴水死詳節烈戴劉氏傳內

歲貢生張麟之祖父左兵破城慘遭賊害詳節烈張徐氏傳內

拔貢生方都韓左兵破城救母被執與妻同時遇害詳節烈方呂氏傳內

生員劉若寓左兵破城持戟與賊格鬥受重創死詳節烈劉吳氏傳內

生員蔡復克左兵破城感妻孝烈憤恨身死詳節烈蔡江氏傳內

陳自舊志作已左兵破城與妻同聲罵賊並被殺死詳節烈陳程氏傳內

楊壇泰州守楊應漸子左兵破城因殺嫡母王氏枕屍慟哭而

死詳節烈楊王氏傳內

周家聘一叙志江南通志俱作嘉聘左兵破城受重創死詳節烈周何氏傳內

生員章文煒左兵破城觸石殉難詳節烈章吳氏傳內

儒童朱元卿與父及兄並所生子女三人皆於崇禎十年因賊氣突起同時被害

清趙煥文以郡掾任陝西白水縣典史康熙十七年興安賊叛令煥文招撫賊轉執煥文脅之降煥文厲罵不屈賊憤而拔其舌煥文喋血濺賊衣怒目視賊賊又憤而刳其目遂棄屍井中事聞賜祭贈河南封邱縣主簿廕一子榮曇入監讀書嘉慶元年錄裔孫世忠承襲恩騎尉

陳豹由吳淞營守備左遷安慶撫標千總康熙甲寅調征祁門陣亡事聞賜銀二百兩廕一子

方希鼎撫標外委從征海寇遇賊於金山下戰死或瘞之江濱

妻周携子往收其骨返葬之

盛殿元安慶營千總嘉慶二年從征湖北教匪至恩施縣遇賊一戰於五寶山陣亡卹白金三百兩彙祀昭忠祠子毓發襲雲騎尉同時有武生孫貴者充馬兵從征教匪隻身夜往偵賊遇邏者手刃數人僞爲賊擊柝遂入賊砦大呼官軍至賊驚起自殘蹂相殺者數十人積功以千總用借補外委後戰歿卹白金二百兩亦祀昭忠祠弟得榮襲雲騎尉張紹庭武生亦馬兵數上首功大帥未及請而戰死安慶陣亡諸兵目紹庭爲魁

義民江一龍慷慨仗義兄弟五人有奇力康熙初餘賊未除殺掠村野鄉人皆聞風竄散一龍獨奮謂衆曰賊至勿憂也吾兄

弟當力拒以全此鄉越數日賊果至一龍兄弟率衆禦之高河埠五人者奮及大呼躍入賊陳左右墮突賊大驚潰衆乘之斬賊百餘人賊黨憤甚乘間復入一龍宅刺一龍兄弟及家衆十餘口五人死然一鄉安堵者此五人功也後鄉里每夜驚兵至則聞五人叱咤聲酣戰達旦云

何廷佐幼隨父遷陝西南商南縣嘉慶元年教匪入陝廷佐糾鄉勇五百人助官軍禦賊松樹溝數有功二年賊攻營破之廷佐與弟廷彩廷芳廷玉俱戰歿兄廷彥爲賊所擄哭訴以有老母在賊爲感動放還負母入山得無恙廷佐妻李罵賊賊怒攢箭射殺之事聞廷佐祀昭忠祠九年勅如外委例議卹子孟保襲

雲騎尉

以上道光志  
江爾維分纂

葉林春嘉慶五年以儘先千總調赴湖北堵剿陣亡議卹恩騎尉一次後廕七品監生文武聽其自就道光二十一年英夷之亂安慶四營兵調隨征勦者凡二百人其陣亡者百九十有二姓名今皆不可考知惟撫標左營外委張祥泰在太倉州寶山陣亡其家人能言之 芮永森時爲儀徵游擊亦殉英夷之難

蔡琪字子樹祖君弼江西南昌府知府父維新江蘇太倉直隸州知州皆有政聲琪浙江寧波府寧海縣知縣歷署樂清建德等縣事加同知銜咸豐二年帶勇勦滅寧波土匪力竭陣亡事聞奉旨入祀昭忠祠賜祭葬銀一百兩賞給世職時粵逆猶

未東擾也

王芳鏞字韻如地封知府銜南河同知居西城內黃泥岡咸豐三年正月奉大府檄率團勇稽查西城子澤字克生江蘇候補從九假旋省親十七日黃昏賊緣梯入城揮刃砍芳鏞首受二傷澤赴救禦賊被戕事聞照原官加等議卹芳鏞被傷後爲團勇昇奔潛山醫治得甦後在潛督帶團練八年於水吼嶺大關力戰被擒嚴刑拷死亦照例賜卹次子賡縣學生六年在淮揚遇害有候選從九品夏雲階與王澤同時被害同案賜卹 夏光前候選縣丞率團稽查城陷在梓潼閣遇害妻曹氏女賽姑同時服毒殉難

丁攀桂爲巡撫蔣文慶差官賊至隨巡撫登城樓將爲守禦計時總兵王鵬飛駐兵西城外先遁官吏皆紛竄巡撫歸署不知所爲或謂攀桂盍去諸攀桂曰不可乃歸率妻子四人從容投塘死

丁仁發撫標右營兵生入泮考充戈什哈日侍蔣巡撫城陷偕妻沈氏子曰賓同赴城內濮家塘殉難 趙玉龍六品頂戴候補千總安慶營外委把總賊猝入城督兵巷戰力竭陣亡子承恩候補外委隨父巷戰受傷投塘死玉龍妻聞夫與子死赴水殉難承恩妻張氏一痛而絕 吳尙廣撫標額外把總帶兵迎敵被戕妻何氏子祥林中林女二姑聞尙廣陣亡同赴北門內

荷花塘死 張樹賢跛一足寄居省垣城陷全家十餘口投蓄水池死 汪瑞珍從九職銜賊入其室瑞珍與從弟監生瑞芝罵之被害瑞芝妻項氏服毒殉難 查懋杰從九職銜城陷罵賊被害妻魯氏率女大姑及弟婦游氏俱溺死甕中賊焚其屋屍骸俱燼 民人蔣祐齡字榮亭居平心橋城陷與妻楊氏子兆豐孕媳盧氏孫五十孫女繡姑岳母楊某氏及同居鄭氏女招弟置油薪廳事全家自焚死賊退里人収其殘骸猶見嬰兒在母懷銜乳未釋 邵之尙與姪必壽在焦家巷遇難姪楨妻潘氏年二十四生子泚樽妻李氏年二十生子澄懼爲賊辱各抱子投水死樽弟必誠未婚妻紀氏罵賊投火自焚楨樽在外

殉難見後 趙宏塾與妻邵氏及子志忠志溥志道俱被殺

張雨泉及妻丁氏子小孖女大姑俱投水死 童美彰被擄服

毒死妻王氏自盡 李興浩與弟興漢及興浩女大姑月姑俱

以賊入室憤罵被害 翁光映城陷遇難兄光華於八年十月

官兵退圍遇賊被害 徐世恩八品職銜率勇禦賊受傷身死

從九職銜朱萃中在黃池圩罵賊被害 候選未入流管連

蓀衣冠端坐賊至延頸受刃 文童夏慶甲在同安橋文童何

忠義在操江廠罵賊被害 諸生黃道隆居府東雅以維持名

教自任城陷罵賊蹈刃死 監生楊良辰耆民李宗儒遇賊逼

降不屈死 民人張正琪被脅不從砍去右足仍厲聲大罵亂

及戕之 儒士夏懋連字勁亭在鐵佛菴遇賊投水王斌投塘

汪銓洋投井死楊盛徵聞父被執奔救受重傷死 府書鄔定

誠在書院糧臺辦公罵賊被害母張氏在家聞耗遂自縊賊焚

其屍 陳起鑑撫院書吏文國治協鎮書吏各在署殉難 營

書李言新遇賊被害 左營馬兵余得和城守營兵楊士元營

兵楊玉詹錦王德彪周萬春俱陣亡 文童諸陞汪海一作生

李傳松李珍李福李邦榮汪志賢楊福耀民人王文治余林發

余五保徐德興徐朝仁吳啟才金萬春金萬福金萬發陳福祥

陳春陽聞照柏袁順潘春貴錢良美錢步青高啟文楊齊昆張

德魁張典五張士彥張德邦張榮志王德潤王聲宏王正仁王

仁義王廷燕王心善王嘉樹及子定王慶蓮王桂林王萬親王  
萬福王萬仁雷千發方志和汪照賢汪光第彭宗器程輔強劉  
興隆劉興美歐師得董貴李致和馬祚春馬迪楷馬迪青馬迪  
雲馬迪采子宏揚馬宏慶馬宏材馬宏吉夏宏信段十九段廣  
材鄭永泰邵定高邵定益谷起貴倪文泰胡家成王家嗣金永  
義馬德彩諸孝先皆殉難 徐高粱江開金江雅鶴何熙臣皆  
尋屍不獲 馮永成被擄至中途脫去賊追殺之曹吉孚與兄  
吉臨之妻楊氏同擄至金陵北河口不屈被戕吉安妻葉氏曹  
龍發妻李氏八年在家殉難吉安文童於十一年在桐城遇難  
曹大喜之妻鄭氏亦於十一年在家罵賊被殺 何本華與母

楊氏妻方氏及弟少堂弟婦方氏姪雙壽女賽兒於二月被擄  
至金陵雨花臺同時乘間自縊殉難

五月賊復犯安慶省垣城中虛無人吏員丁祐昌被害尋屍不  
獲妻劉氏先於正月罵賊死民人李秧生同母楊氏俱遇難  
八月民人王萬青在南門外沿江偵探賊情爲賊所覺被毒害  
以上咸豐三年正月城陷陣亡殉難紳民兵勇一百三十二  
人又張樹賢全家十餘人男婦不計口數五月殉難三人六  
年在外遇害一人八年在外在境遇害各一人十一年殉難  
一人附錄婦女三十三人

九月二十七日集賢關之戰全軍覆沒本籍官兵及義勇死者

蓋數百人其可知者八品軍功右營馬兵朱貴隨守備升謙迎敵至九華嶺與義勇張應發血戰身受矛傷無數死六品軍功城守營兵王啓發在十里鋪陣亡防江營兵毛春榮在壩石頭被戕 洪斌武生撫標右營外委把總在關血戰力竭陣亡兄兆鰲諸生及兄子嗣安僑居丁家山俱服毒罵賊死斌子占奎兵丁於九年五月在定遠縣勦賊陣亡 儘先千總王錦太陣亡妻李氏帶錦太劊付奔赴定遠大營請卹遇賊被害 左營頭司把總徐鵬字竹岑堵左路被十三及死子士勳字伯雅襲雲騎尉世職投効撫標營六年戰歿於巢縣東關左營百總馬鳳亭一作鳳廷事母篤孝立行端直爲同營所敬畏陣亡子咬兒忿

父爲賊殺志復父仇慷慨從軍戰必爭先於六年在廬州陣亡義勇潘元凱隨官兵駐紮三官堂屬左軍分防石灰坳一路同日陣亡 右營守備盛啟泰六品軍功右營外委姬文奎候補外委胡愷防江營千總嚴如龍把總拔補千總朱占春左營把總楊升候補外委何永清城守營把總秦大烈巡營外委吳得有武生艾奪標文生艾懷高二生隨遊擊賡音泰武生艾春來左營馬兵吳學林右營馬兵管啟宗朱榮貴胡得龍余成龍有二一陣亡於梁園撫標戰兵濮印元兵丁朱發朱浩徐志發余起發胡全發胡得元胡起發胡大林陳世發陳望保姚國泰姚得泰姚起才毛雲開毛正洋毛得魁汪忠姜長春金占鰲金正許得祥

戴升雷升郭雲萬全汪順江福翁前福張全福楊榮發楊榮陞  
一作榮聲馬榮高李玉貴劉小花撫標兵張正德胡連發翁奪標楊  
逢春左營兵丁胡全壽紀貴紀天福右營兵丁汪福朱永貴尤  
長發沈長林楊元石廣發陳得發黃愷義勇陳廣美皆血戰盡  
日殺賊甚衆力竭陣亡馬兵胡德隆受傷赴水死 義勇張力  
廣謝大發隨官兵駐紮和尚山麓黃泥冲防團山頸一路王曰  
倉與長子國樑及桂大駐紮虎形山防小且記嶺一路防江營  
哨官雷陞兵丁潘長發孫發孫長發皆別當新寨嶺一路同日  
戰歿王曰倉次子友祥及許永泰駐紮長蛇業防石門湖口一  
路友祥聞父兄均戰歿與永泰俱投河死 義勇陳春楊

春陽有二

一見前

亦分守新寨嶺奮勇爭先殺賊尤多見右路勢不能支遂  
衝入中軍與馬聲發合力衝殺所向披靡戰至日暮身受二十  
餘創死陣中右手猶執斧不釋 勇曰馬聲發驍健善拳勇可  
敵數百人隨統帶已革臬司賞六品頂戴張熙字勦賊洪家鋪  
全勝賞六品軍功時侍熙字左右賊撲關聲發衝殺數十百計  
官兵三路皆被困傷亡殆盡熙字拔佩刀將白刃聲發奪其刀  
負之以行手刃悍賊多名賊圍之益急聲發遂以熙字付散勇  
葉金玉等而雙刃導前刺賊開路突圍而出復率突圍勇衝入  
賊陣賊圍之數重勇皆戰歿聲發斬一賊目奪其馬再突而出  
比賊至桐城聲發復接戰殺賊甚多身受重傷旋死 左營馬



兵詹貴亦隨熙字至桐城天寧莊接戰陣亡

以上三年九月集賢關血戰陣亡本籍官兵紳勇七十六人  
六年在外陣亡二人九年在在外陣亡一人附錄婦女一人其  
廣東帶兵官可知者伍登庸一人列入名宦傳其餘官兵千  
餘人皆無從考其姓氏矣

宣憲武素性忠直賊攻關或勸憲武避之憲武曰官兵忠勇如  
此何懼及官兵覆沒賊至憲武家見之曰此書生也欲降之爲  
作文書憲武不屈大罵遂被害宣保泰亦以不屈死賊焚其屍  
韓春林亦以不屈被害妻李氏大罵賊以殉同時韓春萃韓  
才俊潘雲慶潘得發李三胡興桃胡興杓周恆德馬家仁馬元

福許道義嚴廷弼監生張虞書皆在擄中以不屈被戕嵇萬彩  
嵇萬福因救父與賊鬪遂遇難又有周恆德者在新寨嶺被殺  
李尙富投水死從九楊椿於是年十二月被害

以上三年九月殉難十九人附錄婦女一人

四年賊踞境交童鄭承基在太湖帶團堵賊與兄承荃及鄭太  
皆陣亡承基父六品軍功鄭永清五年八月在廬州三里岡隨  
營勦賊陣亡 團勇勞松柏在太湖縣北門禦賊陣亡 民人  
方楷因賊伐其祖塋蔭樹往抗之被繫遂自經死鄭純嘏盧譽  
隆被脅不從遇害團丁葉鳳魁在欽化鄉潛匿官兵火藥賊覺  
虐殺之

五年吳顯彰陳亦民李師孔蔣茂青俱在龍見嶺遇賊被擄入城不屈同時遇害 金綸諸生時賊禁薙髮綸伏處山谷時時薙之突與賊遇受笞辱邑鬱而卒

六年正月練勇張升在桐城力戰陣亡 廩生金涵與賊遇爲所脅涵仰天歎曰我誓不爲賊屈賊毆辱之歸恚忿嘔血而卒三月文童金道平在途遇賊被害 鄭士華六品軍功六安州人知府李元華再統鄉勇出潛山士華從之接戰於潛山四柯松殺賊甚衆陣亡 十月撫標兵宋必貴王貴玉鄭貴林太在桐城陣亡 胡昌瀛被擄不屈中途受害 十二月份生康紹文遇賊大罵執之不屈遂遇難

陳洛周字伯鴻父世鎔見仕業傳洛周諸生聰穎絕倫以戰洪家舖功賞六品銜援例以知縣候選十二月在潛山縣西門禦賊受傷死

儒士張力賢父國薦居齋人舖人稱長者力賢與兄力學俱教讀奉親潔清自好安慶陷力賢與兄誓不忍居賊境逃至浙江覓地避亂歸迎老親力賢路遇賊被害力學邑鬱病沒母曹氏於八年十月遇賊憤罵不絕口賊以石磨擊其背死

七年廩膳生員楊誼蓮被害誼蓮生平慎然諾尙氣節三年七月張熙字以五百人自廬州府來守集賢關誼蓮約邑人團練助之未集而集賢關戰沒六年官軍由廬州府規桐城其年大

早誼蓮集邑紳士籌備米數千石以待官軍道梗不得至已而果以糧乏退賊中頗聞籌米事七年突至廣村偵誼蓮舉動誼蓮鳴鑼集團賊遽擒之問米何在曰無有也賊睹其風儀峻整不忍害之從容問曰爾能與我共大事乎誼蓮曰我皇朝廩膳生員也豈從鼠輩反乎遂遇難親老子幼邑人哀之

馬迪元縣學生寄居六安州賊欲屈之不從曰生平讀聖賢書爲秀才豈不知節義二字死卽死耳遂遇害妻袁氏挈子宏彬媳楊氏避亂州之南鄉楊氏性至孝姑婦不能暫離九年二月賊大至袁氏率婦同投塘中賊見之急用矛引起袁氏首觸矛死後其子至出其屍姑婦相抱牢不可解云 八月有五品軍

功何筱菴者罵賊被害妻夏氏投水殉難胡大籽在鯉魚山被害 是年冬增生黃焯遇賊逼令擔囊焯大罵被毆投塘水死 民人曠凌洲被擄不屈中途受害 農民潘金華有勇力居齋巴樹賊至輒與之鬪斃賊甚多賊目覺出大隊擒殺之

八年八月楚師圍安慶四民爭供薪米任轉運雜役十月署巡撫李續賓覆沒於三河安慶圍師退屯宿松賊遂肆其狂噬 黎燮字宗仁監生寄居大龍灣居恆慷慨好義始楚師之至將軍都興阿諭充練總製械募勇不憚勞瘁及官軍退賊出城肆掠至燮家知爲練首將縛之燮知不免高聲詈賊賊怒劈其頭頂燮益罵不絕聲賊以刀矛攢刺之遂殉難子婦金氏孫山齡

姪孫九齡暨孫女二同時罵賊被害 文童李必成聞賊過長  
安嶺集衆堵禦賊大隊擁至不能敵遂投河死 程永勝亦以  
禦賊力鬥死

汪元振縣學生父桂芳監生元振性剛重義官軍圍省元振踊  
躍從公及退元振奉父匿深谷間賊搜掠巖壑擄其父元振追  
呼請代時賊中急須文士且以其父老邁遂釋其父而監守元  
振甚嚴令司書記不應厚飲酒食不受屢勸不從遂挾至舒城  
意在從容服誘之元振始猶隱忍思得間歸養竟無隙可乘乃  
潛作書付同擄者爲寄家中語慘怛而氣激烈旣不得歸侍老  
親又不欲久生賊中除夕罵賊受刃臨死不絕聲老親尙倚閭

而望同擄者逃回始知其死云 何書美因父被擄赴救求代  
不許被殺 胡光熾因兄被擄赴救求代不許被殺何振先以  
弟榮先被執忿往詈賊賊殺之 文童鮑楨霖三月在家因擄  
不降被殺

馬家珣字伯珩父道然諸生家珣讀書麓識大義性直質勇而  
有力居恆遇不平事輒私罵之是冬賊大搜掠珣居大龍山之  
麓登高以望放聲怒罵賊聞圍逐之珣以石擊賊目破其腦斃  
之羣賊攢殺珣至死罵不絕聲

江奎祖濬源見仕業傳父爾維見文苑傳奎爲人肫摯耿介績  
學未遇以軍功給六品頂戴賊初陷省垣遍張僞示奎見之輒

爲之歔歔廢食遇受僞職者必責以大義其人未嘗不愧而悔悟也大兵臨境奎糾鄉人擒賊中典硝僞官查某送潛山大營正法十月逆首陳玉成援皖偵知奎殺查賊事搜獲之奎憤罵投水死 三橋鎮人周世寵官軍至集資餉米百石給六品頂戴及退師被擄至分龍嶺不從遇害

程里萬監生大兵抵境里萬隨營辦薪米夫役及退蒼黃避於龍山賊偵知里萬之名執將殺之子富文奔救與賊力鬥死里萬帶傷逃越五日亦死 程玉監生臥病不能行令子偵興團練賊覺獲玉縛之令出其子見病垂絕棄路旁死 丁志明被擄母田氏力拒以杖擊賊與子俱被害 張靈敏父老不能行

須侍左右賊至家人皆避去靈敏遂被執不肯舍父去賊怒殺之 丁宏魁汪執廷江慶堂皆因老母臥病不能離側被擄不忍去怒罵與賊抗皆見殺

汪大綱字月亭世居南莊嶺素性剛直年近七十率眷屬避亂棗園賊至索財物大綱不與罵之遂被害嫂孫氏縣學生式金之母及大綱妻盛氏式金妻阮氏皆自縊式金客死河南 汪鴻猷世父姓父珏同產俱縣學生以盛德聞鄉里鴻猷讀書純樸鄉先生皆稱其循謹貧病無資不能遠遁避居蘇家戶賊至脅降不從投水妻湯氏及其未字女五姑相隨赴水俱死 吏員汪惟善賦性忠厚七月在山口鎮遇賊被脅不屈投水死

童效明力田爲業遇賊不屈受重傷死妻嚴氏年二十四勸夫非命誓撫遺孤十一年七月賊突至威脅使從嚴氏慮莫保託遺孤於鄰媪遂赴水死 沈子嘉罵賊被害妻顧氏寄居桐城境小龍灣賊至投水殉節 文童陳遐齡勇丁夏餘義爲大營集民夫挖濠遇賊殉難 程廣仁爲人耿直不阿言及賊情怒形於色李忠武續寶戰沒於三河有成某帶兵援桐城廣仁爲招夫役五百人未幾桐復陷廣仁遂隨營至太湖久之歸遇賊於五猖嶺爲亂及所戕 李懋修李高才吳忠和何昌有在灣塘嶺大營轉運軍械赴桐城遇賊被害 韓錫松性拘謹不知外事賊執之以其文士欲生致之爲治軍書不從乃撻之錫松

罵曰賊子賊子何敢害我賊怒縛之錫松益高聲大罵衆賊環刺之身無完膚仍罵不絕口賊焚其宅擲火中骸骨灰燼時年甫二十 農民張秉爲軀幹甚偉賊獲之欲授以僞職不受出僞服誘之秉爲曰汝服之我以為恥而令我服之人能無羞我乎不可辱祖宗汚子孫也賊憤殺之 楊宜春在十里埠遇賊倒縣之索財物不與罵之被戕焚其屍 棗園馬君佐充官府書吏賊令降不屈罵賊賊虐殺之 儒士胡以林文童蔣允富陳長生民人汪廷俊黃有禮余前禮余正益楊根華江發和潘之弼潘德耀孫雁發洪雁遠俱以被脅罵賊死文童徐子卿遙罵賊中火槍死 民人諸鳳文諸鳳墀諸世熙諸大葉學如葉

松林汪道奇吳世恒楊榮先楊愷豫張廣義余大柯胡家瑞程敬德程榮程封建鄭德榮鄭因福謝洪波丁派長丁焰長丁永奏黃多福張瑩之張榮之張勝魁王慶齡畢盛遇沈寶魁任全益徐德起余江海劉萬福吳時林操祿身胡寺興汪蒼懷彭叙勳唐長青皆以迫降不屈被害江元傑被擄至火龍埂龔必大至三官堂何玉清至瓜園程炳蔚至新安嶺蔡德榮至茅廠坂楊棟材至石牌顏桂林至小史港文童陳熙齡至吳敖嶺皆不屈死 郝秀嵩在望江十里寺寄居殉難 文童蘇廷端年十九從九品蘇受傳之子被執侮賊賊虐撻之身無完膚罵不絕聲賊衆持刀逐之奔赴水死民人石百慶劉真一皆以迫降不

### 從投水死

王志立三河之敗安慶圍師退堵於潛太之間志立擔送軍械畢回尋家屬道遇賊脅爲挑夫志立曰吾適爲官軍擔義也分也豈可復爲賊擔邪賊怒斫之益厲聲罵曰寧死不爲賊擔衆賊攢殺之 程鎮清性剛直織布爲業遇賊被執令負擔不從與之錢鎮清不顧詈曰我乃清白傳家何能爲汝擔強擄之物賊殺之碎割其尸越六日族人歸而殮之面如生 洪鳳先賊以繩羈其手令擔荷鳳先不肯曳繩走塘水中賊環刺之 胡錦昇年七十五賊脅之當夫役錦昇曰老民嘗受皇恩豈可爲賊充夫役令引路錦昇不應而走賊忿刺其頭顱死胡百齡亦

以不爲賊擔物見殺何田保素有勇力偵賊日至欲出其不意擊之未及舉而被執令負擔田保厲聲叱曰我乃皇家百姓豈肯爲汝擔強擄之物賊以鋒刃脅之田保曰要殺便殺要從汝去斷斷不能如此數次遂被害 楊義春劉國香潘元魁皆以力鬪傷賊賊聚衆擊害之 儒士程康慶精醫有名於時賊聞往求醫不應遂斷其臂死

九年八月民人王俊在桐城東鄉接戰陣亡 程懷邦丁作雲邨世榮俱在石牌被執不屈死李萃華汪可法宣普照鄭春福陳廷贊張德廣張朝綱程康餘皆以被脅不從遇害十一月陳世卿死於望江金鐵嶺

十年正月民人李金富李延林在太湖縣殉難 三月官兵復進圍安慶監生何鴻儒在集賢關禦賊陣亡沈亦祥以不屈罵賊死 四月民人徐德玉徐宗蘭徐宗起曹家智程廣和李簡王開泰李松舟李會波皆被脅不屈遇害李安樂死於高河埠八月陳武賓以不屈死汪芝生投水自盡十月江振泰爲將軍多隆阿大營採辦軍米遇賊殉難張孝思亦以是年爲大營運糧遇害

十一年官兵圍省垣益急援賊肆掠邑人居者議團練爲扞禦計七月賊大至強弱衆寡懸絕剛者罵賊被害柔者延頸受刃何可以悉數嗚呼



陳崧字松年邑廩生世讀書有聲庠序家貧授經爲生與兄大受最友愛大受精醫學不分日夜請輒往二人自城陷後隱處山莊不營家計惟聞官軍至卽潛往迎之大軍復圍省垣時與同人痛飲曰長夜將旦自今可復見天日雖死不恨矣三月爲官軍籌辦芻糧忽援賊自潛太至經三橋頭崧宅兄弟俱被掠脅爲掌僞文書崧託言不識字頃之賊與官兵戰崧夜與兄卜冀官軍勝得乘間逸賊覺之詈曰死妖魔不識字何爲知卜迫之更衣聽驅使崧不可賊縛之大受前爲解救賊刺殺之崧見兄死怒髮上指大罵賊受刃而死同里被擄者見之俱爲掩面流涕其夜妻楊氏夢見崧告以殉難處驚而曉賊退往視之面

如生 楊儀文六品軍功從提督楊岳斌於安慶水師三月禦賊礮傷陣亡民人查志寬亦於是月被害四月楊勝益被擄不屈殺之

江萬村居湖業漁鄉里議團練萬村號勇捷七月賊大至不能敵賊入其室得兵器村知不免奔立水澚以俟賊中悍者二人追至萬村奪去其刃扭二賊入深處俱死 勇丁阮鳳美奮力擊賊勢不能支帶傷赴水死 民人費永林見賊肆掠奮殺二人衆賊縛永林於樹攢刺之碎其首而死程康昇隨營禦賊力戰陣亡 監生何忠慊在集賢關外民人於孟元於學才在烏突嶺禦賊陣亡 黃步曾喊衆擊賊持械鬥死身無完膚 練

首王堯賓督團禦賊陣亡賊碎其屍練勇潘成章潘曙嵐潘懷和潘堯明皆忿怒殺賊陣亡 練首孫述命字宜之在汪洋保督解芻米赴營路遇賊來劫民夫驚潰述命護糧抗鬥受傷死 高超凡爲大營偵探至赤岡嶺爲賊所獲被害 甯彝玉武岡州同彝訓之弟赴大營公幹至赤岡嶺遇害余繼貴爲營辦公路遇賊被執搜出護照自撞死 陳臻監生從戎効力賞給五品頂戴七月在家遇賊搜獲執照劄諭及其弟監生陳善俱加拷問剗割無完膚同時被害嫂產氏年八十哀號罵賊被殺 儒士汪揚烈七月在家罵賊被殺

鄭古儔十歲失怙哭慟盡禮如成人母積憂成疾古儔親嘗湯藥朝夕依戀膝下母教以發憤讀書遂篤志好學至老不懈尤喜節錄忠孝節義故事屬對成文以便記誦母病篤醫藥罔效遂精心醫術禱祀調劑母病果愈時以濟人爲心常製方藥以振危困是年三月援賊入安慶掠其家見方藥知爲醫也欲授以掌醫僞職古儔不答驅迫以行終不屈挺身赴水死 程楠江歲貢生家居教授務敦品立行以廉隅自飭後學宗仰之省垣陷隱處巖穴感時傷懷嘗賦詩見志累百餘篇多忠愛之忱是時官軍再圍省城甚急賊援自潛太來掠楠江家得其感憤詩並歲貢執照大怒縛欲殺之賊中有言其老邁不足與計者於是不果殺楠江憤鬱咯血數口三日不食死

潘鈞字鑑堂諸生完白山人之壻也居平敦品厲行仁厚忠恕學有本源以教授爲生三月賊入其村脅使擔荷鈞叱之曰我讀書一世垂死豈能爲賊役賊舉刃相迫鈞曰吾年八十豈畏死邪賊刺之終不可受重創十餘尋卒子慎生舉人見文苑傳汪蔚其字守成諸生安貧立行敦勵名節安慶陷後竄伏山谷間藍縷憔悴妻子皆枯槁至是以官兵圍省垣挖長濠欣然有生意忽賊四掠爲所擄蔚其不勝忿恨謂賊曰吾讀詩書一無所建白延生至今得死爲幸惟惜不能少待時日見汝輩暴骨爾賊怒殺之拋其屍

丁志大侑生食貧力學訓蒙自給賊入其室知爲士人欲挈之去固辭賊怒脅以兵志大奮然曰吾讀書曉禮義安能從若反邪賊愈怒寸剋其膚隣媪跪救之不得志大至死罵不絕口葉祥禮性耿介嘗作事君能致其身文慷慨激烈識者知其氣節賊踞省垣祥禮匿山谷間賊聞其名將迫之應僞試設計逃走又有黃孔昭者賊得其在逼就試孔昭潑墨污卷得釋回至是皆被擄不屈罵賊遇害

裴鼎縣學生家貧以課徒自給時賊野掠鼎以母老病篤不能遠離賊執之使降鼎憤罵不休同里有文童王名標亦於是日被執罵賊不屈同時被害 民人張文琳被擄不屈愛重傷躄躄歸送母匿山中賊搜山復被執文琳曰吾前爲老母忍死須

與今再被擄誓死不相從也賊斫其首欲斷逾半月死張廣林亦被擄乘夜放去同邑被擄者八人約與俱逃賊覺寸磔之孫文志因守母柩不能逃賊執殺之 五品軍功方斌原名吉茂三月被擄不屈賊斫其脛不屈割去兩耳不屈舉刃數砍其首呻吟數日死 張義方不屈嚴刑拷死監生張啓祥賊褫其衣燒銅錢烙之終不屈倒縣而死監生張文治賊倒縣之索財罵不與殺之張思求張善良張春發張聲明張文譜張時進張鳳吟張標榜張玉培俱以不屈被戕張麗金擄至南莊嶺終不屈殺之 韓上賢性至孝賊擄其父上賢赴救哀切求之不得乃犯其鋒與之爭被殺其族有韓良茂韓敏事皆以被擄不屈

罵賊遇害韓千里擄至金陵不得脫自縊死 程德明因賊擄其父哀泣赴救母阻之德明竟奔賊求代父父得免德明遂被戕 耆民吳金林罵賊賊毆之子開盛趨救與賊力鬥俱被戕黃松盛賊入其室護母不去賊脅之不屈割其首以去其族有黃尊舉黃爲政黃福正俱在家不屈遇害黃發榮在昌方嶺黃復源在甘露庵黃福元在蓮花鋪黃正音在陳家冲黃天運黃玉田在赤岡嶺文童黃槐庭在高河埠俱被害黃大丑在茅山橋投河殉難

耆民鄭必安舉家遇賊見擄老幼男婦相護罵賊不屈與姪東海秀封西海及子某並東海之妻某氏及孫某西海之子某又

姪孫二某某同時被害 鄭長興與妻曹氏及弟從周弟婦程氏並四子一女姪姪女同時遇害 胡祖堯與嫂嵇氏及弟祖誨姪以忠簡保在馬鞍山胡東昇與弟聲振時與祖鍾及子松林在高橋嶺同時遇害 劉照廷與妻謝氏子望保二保及嫂程氏姪庚保姪婦何氏在阮家圩投水死 徐生甲徐德安徐德揚俱遇害徐德鳳與弟德遠友愛俱罵賊投水死數日屍浮水面猶兄弟相携手不釋 程永久與子松林在程家灣及程道全程虞富嵇登本與弟登名侍母疾不能遠離均遇難陳學武與弟學恆在柯家圩投水死 儒士胡毓成罵賊賊三分其屍弟毓華俱死胡理和喝子孫與賊鬪及胡正和胡奉璋胡採芹皆被殺府學生胡英罵賊自盡文生王太平賊至不屈與弟鏡明及幼孫皆遇害

朱紱監生生平恥無行勇於任事賊踞省垣脅使受僞職多方賄以金得免六年官軍克復潛山擬進兵安慶就地徵軍食紱與籌米穀以俟賊偵知之遂入紱家焚掠妻何氏投水死官軍再圍省垣紱仍効指臂七月賊擄獲之知其爲紱也虐之紱大罵遇害 嚴百川與妻鄭氏邵宜家與妻楊氏楊起院與妻吳氏汪率性與妻朱氏在松岡嶺劉功成與妻汪氏在阮家圩程鳳彩與妻許氏在石牌程家洲均被害 耆民查韻堂在陶亭岡遇賊被害妻江氏投水以殉謝月盛被害妻甘氏悲痛咯血

死馬宏達在縱陽被害妻宗氏哀號致疾死 程有虞擄至赤岡嶺令築營不從被殺妻王氏聞之哀痛而卒程東超程紹先有勇力賊來掠與鬥死儒士程富年罵賊受刃程貴鳳爲官軍築縱陽堤投水死程王章受辱自縊程富才程康華程康義程貴保程康谷程佩環程安蓮程永標程永謨均殉難 幼童王和尚隨母某氏齊小孖隨母某氏投水死

江從辛諸生穎異博學善屬文時人稱爲江腹笥年七十有二賊入其室從辛怒曰生不如死以杖擊賊遂被害 胡筠監生年七十二猶好學不厭賊裸體入其室筠怒羞罵之賊怒縛筠於樹喝衆賊攢刺之 耆儒孫傳義鄉飲大寶孫連級字延訪

年七十餘罵賊受傷投水死又有孫吉祥文章孫序皇在枝梓橋被擄不從見殺孫脩身年九歲賊至舉家奔避脩身前往罵賊及孫翠和皆被害 耆儒鄧中愷年七十餘因牽牛罵賊及鄧桂馥鄧履祥鄧禮發皆被害鄧儒久受傷赴水死者民程萬明程如啟年七十五及程善德程康久罵賊被害裂萬明之屍程啟斌投水死程富綸程富心俱髻稚被執不從皆殺之耆民江福存年七十三素性耿直取與不苟被擄至集賢關不屈遇害邵福貴年七十二在冷水鋪罵賊殉難 監生容承緒年六十八容邦照年六十及容華松容鴻槃皆不屈遇害 耆民雷砥柱年八十餘耆儒王聞岱凌學顏年七十一程乙照程派曾

年俱七十章炳餘王堯賓

堯賓有二見前

鄭步雲年六十五皆素性

質直賊至忿罵被害

史承閻年六十九性公正賊掠鄉村被

執罵曰吾豈與鼠輩同流賊怒殺之焚其屍史實錄監生年六

十閉戶勤學不與外事賊至其館猶手執卷見賊怒罵被戕史

進樂監生有徐氏子幼流北直進樂買爲僕閱數年徐見而識

之進樂遣歸徐以金還不受年六十餘亦讀書不輟賊至不屈

死產同頡儒士力學不倦賊肆掠被執索金不應賊刺之洞

其胸產同性儒士教學鄉塾賊突入其館執至賊管迫易服不

從賊曰從則人不從則鬼同性曰不從則人從則鬼賊曰不從

則死同性曰不從則生從則死汝殺我我不死矣賊怒刺其喉

而死產元昌儒士家貧甚賊入掠無可取者責令荷擔不從賊

熟視之曰汝爲士請從我去將奉汝爲謀主矣元昌唾之賊罵

曰汝欲變妖不如送汝昇天遂殺之民人產昌盛產英拔產迎

春均罵賊死之

諸生潘良金文童潘傳珠民人潘志濤潘楚珍潘德柱潘秦書

皆以罵賊受毒刑復殺之投德柱屍水中民人楊誼獨楊三

林楊心友楊繼鏡楊效烈被擄不屈見殺楊春發至姚家汊投

湖楊作屏至山口鎮投河死文童楊繼晉被擄至楓樹塘楊映

生至科甲冲楊雲榮至大河壩楊太雍至方家冲楊德萬至二

個坡楊心保至竹木凹楊福長楊啟元至冶塘楊華先至分路

口楊錦鳳楊龍山至鯉魚山楊言生楊泰興至大橋頭楊廷茂  
至山口鎮楊如一至黃梅山楊文宗至磨盤基楊禎祥至馬鞍  
山楊守名楊善長至宿松俱不屈被害 民人劉節用罵賊賊  
殺之碎其屍劉德美在楊徐保劉金聲劉金書劉有發劉名著  
在大橋頭劉錦貴在夫子岡劉萬貴在冶塘劉應宗劉澄定劉  
禮智在家劉蘭翠劉金貴在腰塘冲劉萬有劉學林劉平安劉  
祥珍劉相助在阮家圩劉以財劉以富在何家嘴劉發全在赤  
岡嶺俱不屈遇害劉典華在山口鎮劉發和在阮家圩乞人劉  
桂華在大勝磯俱投水死 陳仁和陳文運陳餘有陳明廣陳  
家林陳家禮陳翠林陳鳳鳴陳惠來陳紹元五品軍功陳家齊

俱在家陳德明在黃土嶺陳德明在戴家店武生陳定甲擄至  
三十里鋪陳陽和陳銜恩在雙塘老屋後陳金廷在科甲冲俱  
被害陳朝松在山口鎮投水死 程嘉會程德薰不屈拷死程  
致和程培世程永錫程懷玉程盛玉程朝舉程新安程芝山程  
祥緒程世培程盛謨在石牌程家洲俱不屈死程宅仁擄至小  
池驛迫易賊服不從被戕 丁彝鼎丁志鈞丁廣友丁宏毅丁  
伯陽丁永廷丁君選丁得魁丁曉三丁發玉丁大生丁志珍丁  
憲章丁九成丁志紳丁國才丁玉同丁榮貴丁三二丁錫萬在  
虎尾山王厚沛王義和王春孚王榮翠王炳榮王道義王正祥  
王德福王鏡明王崇義王朝珍王金貴儒士汪孔康賊使作文



書不從憤罵汪家琨汪玉放汪揚烈在家汪永祥在大橋頭汪  
殿選汪定邦汪啟發汪心有在松岡嶺汪方明汪倉儲在瑤園  
巷汪文耀在集賢關方鳳和在楓樹灣方曉春在石山脚方學  
孔在高橋嶺方永昌在陽壩方雲從在泥河坂及方星明方老  
方家鎔方守先張宏崖性剛方被執罵賊張體道在馬踏石張  
文謨張良俊張恒先張啟儉張瑞雲張德廣張朝綱張治綱張  
雲岫張宏業張懷善張敏才章宏發在陳家冲章爲志在裴家  
戶儒士章惟志在錢家戶章學忠在冶塘章惟智章春林縣書  
彭世連蔣有志在蔣家山蔣輔朝蔣正北同在山口鎮投水蔣  
理坪蔣廷爵范榮林居磨山李鳳高在裴家戶李三元在楓樹

嶺李文盛在宿松李從龍在高河埠李錫輦在清河李遠發李  
會波李萬全李長言李榮先吳錫齡在黃泥墩吳祥興在大橋  
頭吳壽田在家吳朔昉以子被擄忿罵力阻吳清友吳清義吳  
太和吳佩璜投水朱發和朱沛雲朱德爲耆民胡亞書在大橋  
頭胡松林胡小容胡小籽又有胡元林在紫霄觀胡配賢在早  
水壩胡躍先在太湖小池驛胡登舟胡效語在土橋坂胡效高  
在戴家店胡德江年六十三余道林在長安嶺徐成章在集賢  
關徐六保在冶塘罵賊於沛二於長生在磨山洪廷桐在羅家  
嶺馮月明馮福堂在冶塘馮天騾在馮家塔嶺江金元在汪家  
舖江文彬在山口鎮投水又有江德榮江鑾階金四保任孝與

在老鶴嘴省墓凌學言蔡藍田文童戴昆啟幼失怙恃事祖母以孝稱戴配天戴玉峯戴玉林戴恒書在戴家冲戴世雍戴千壽戴玉真戴休仿戴萬福桂永松齊德明斯宗仁在馬踏石投水儒士鄭華茂民人鄭華茂鄭德馨鄭克成在聶家冲鄧甘子曹保榮在山口鎮投河曹東明包國明姚世欒趙發如趙聲唯操用楨操秀榮操祿貴在大豐鄉龔敬德在冶塘邵學超在石牌邵集興邵奎元在邵家墩邵宗渭邵崇志監生韓慶榴性剛直忿怒抗賊韓宗明韓長發樊道廣邱玉堂在高河埠烏林嘴夏餘用在源潭舖查繩武查立勤查德彰何君聘在潘家坂何顯耀在黃山何乖籽何愷籽投水何錫疇何以富何祥麟何占

魁在高河埠嚴殿和詹家瑞在鮑家河甘保坤葉名甲在陳家冲葉倉明居梅湖呂鶴梅俱以被脅不屈遇害或知不免與賊忿罵至於碎其屍而焚之六品軍功馬永楨自投火死儒士黃道全賊入其室闕其子婦美求之已遁去賊大怒縛道全於柱令使人招之道全責其無恥非人賊以煮洋煙鍋鍊赤置道全頂上謂之曰汝可戴銅帽子如是者三遂斃 八月朔官軍收復安慶

十月孫鳳鳴在桐城途中遇賊脅之不屈被害

同治二年三月捻匪由湖北麻城羅田一帶敗竄掠及縣境青草隔等處迅不及防被害殉難者甚衆 蔣修富警至父命携

眷先避己留視家宅修富行數里聞匪已至急回視父已被執  
修富前救匪執之而釋其父修富遂力鬪死蔣修道同時從母  
避亂行遲匪將及之母命急走修道不忍舍去一匪追至與鬪  
匪不能勝踰刻匪衆至遂遇害 方啟大與弟肩昇祖母避亂  
遇賊脅從不屈與難 李今成儒士在里塾聞賊至執其父奔  
救嘔血死

以上自咸豐四年至同治二年在籍陣亡殉難紳民兵勇六  
百十有三人附錄婦女三十六人

何法祖安慶城守營千總咸豐二年八月奉調出師湖南岳州  
十一月初七日戰於新牆驛陣亡三年正月妻張氏聞耗殉難

夏寅六品頂戴城守營頭司外委把總黃金印六品頂戴記名  
外委朱得祿

原出繼陳氏  
名陳得祿

防江營經制外委把總邵春榮防江

營哨官張淦潛山營把總暨安慶城守營馬兵張義發戰兵朱  
義和兵丁楊華馬洋方立本右營兵丁張萬鈞皆同日新牆驛  
陣亡 江占鰲儘先把總與子國才外委戰歿於南津港 汪  
萬青城守營左軍外委千總儘先把總於是年八月隨同本營  
都司馬步霄並本營兵丁馬宏啟馬迪發柳和白純福等一百  
五十名均以奮勇調赴湖北省城堵剿十二月初四日出隊大  
東門外血戰陣亡楊明發參將楊昆防江營哨官均於三年四  
月礮傷陣亡於江西南豐縣 施鴻恩撫標右營把總六月在

懷遠縣勦禦擒匪陣亡 邵春暉撫標右營儘先千總朱發安  
慶營左軍左哨外委署頭司把總沈占魁外委胡銑九品軍功  
均於十二月隨巡撫江忠源血戰陷於廬州府城撫署書吏王  
書富王書吉盛彝良同時殉難

徐大成字迺庵河南武安縣典史在任殉節僕江福同遇難  
守備銜王國賓寄居金陵綢市口二月城陷率妻某氏妾某氏  
與二女某某同投塘水死 張沅龍與弟沅鯤及外祖母鮑劉  
氏母李氏妻申氏弟婦劉氏妹大姑二姑寄居金陵城陷同時  
殉難

馬家福城守營戰兵咸豐二年調赴湖北陣亡 從九品謀德

成於三年二月金陵城陷陣亡給雲騎尉世職母旌表節孝朱  
氏妻張氏均殉難又文童謀克仁同時陣亡

吳太右營外委陳占魁撫標營兵於四年陣亡於廬州

孫耀衡五品頂戴記名把總於五年三月在懷遠縣帶勇力戰  
陣亡 兵丁盛宏標何慶華三月在巢縣陣亡 左營兵丁楊  
士衡在合肥長樂集陣亡 馬榮美六品軍功在六合縣帶勇  
隨勦力戰陣亡 王寶書六品軍功隨編脩李鴻章營辦理文  
案六月在巢縣小峯嶺被害 右營守兵胡啟發楊士宏盛有  
才在西口力戰陣亡

管兆蕃前任江寧府上元縣醱化鎮巡檢留鎮幫辦團練六年

五月賊大股圍之子齡候選衛千總帶勇迎敵斃賊多名力竭陣亡兆蕃見勢不支大罵賊受及而死妻王氏子婦任氏孫婦路氏及曾孫敬醕敬臨同時投水殉難

邵楨安慶防江營書吏從署安慶協副將塔思哈勦擒匪舒廬之間以勞績賞六品藍翎候選從九六年三月五日攻勦張落刑於懷遠與弟樽奮勇決戰陣亡樽先隨安慶協副將松安勦賊廣西賞六品頂戴儘先外委眷屬先於三年正月殉難已見前蔡長泰撫標右營藍翎外委把總梁金標六品軍功右營外委及右營兵丁蔡成太何義宏胡全福盛洪彪江啟發金國祥金國楨黃長發陳建勳趙全江榮貴韓起發何立宏程光美孫

耀衡

耀衡有二一見前

李得李春發方坤同時力戰陣亡兵丁馬祥陳

啟馬正榮張永耀陳明山吳祥泰吳金貴胡全張全艾基山閔太周泰馬麒麟陳順陳炳榮梁金接盛標張國賓趙標劉喜榮蔡升許占魁張世榮胡義發朱世發姚啟發潘啓和何愷金榮金祥發湯得勝江占魁俱十一月陣亡 馬宏亮亦於是月在廬州陣亡 馬龍彪池州營把總馬聲明五品軍功曹德恆六品軍功及兵丁馬家良七月於廬州梁園禦賊戰歿 馬順清五品軍功在六合帶勇隨勦陣亡 九月藍翎防江營儘先外委楊榮發十一月撫標兵王淦臣張永勝在巢縣陣亡 彭玉堂右營外委在亳州陣亡 張錦江本姓 侯選從九方燮五品

藍翎左營外委章洪恩左營額外及六品軍功左營馬兵盛政  
觀胡凱戰兵徐斌守兵徐某右營守兵張守勝皆於十二月在  
巢縣東關力戰陣亡

儒士李昌達在六安課徒賊至其館逼降不屈罵賊被害

鄭自燿字午橋由吏員選授雲南順甯府右甸經歷保升知縣  
補富民歷署麗江通海二縣及雲龍州事所至有聲升湖北荊  
州府清軍水利同知改捐仍留滇補用署景東直隸廳同知值  
者干匪徒滋事之後招回難民加意撫卹景東地方寥闊無城  
郭可憑形勢控扼惟瓶罐窰爲達治所要口於是籌辦團練咸  
豐七年十二月賊有兩股由山側竄出卽添調漢回勁練屬遊

擊特某並督標兵駐防瓶罐口練勇接戰敗潰遊擊陣亡自燿  
復督練前進練長張國驥受重傷死自燿被困身受七十餘傷  
與家丁李桂戴興曾福並差練百餘人同時陣亡匪退尋屍殮  
殮於昭忠祠宇郡中漢回紳耆士庶咸臨持服焚燎泣奠葬於  
城南泰安門外錦屏山開化寺後紳民負土築冢哭聲震地數  
百里來奔者絡繹不絕事聞照陣亡例加贈道銜優卹並准於  
死事地方及本籍建立專祠嚴鴻猷副將七年在直隸大名府  
南樂縣東與捻匪力戰陣亡 戴存慶六品軍功正月隨營由  
桐城退至廬州戰歿撫院書吏徐高楷陳文瀾同時被害 左  
營兵丁周咬兒在合肥長樂集陣亡 彭立正千總春月帶勇

隨赴和州防勦於河村鋪接戰陣亡

和州志云立正咸豐七年  
隨和州知州陳啟昌帶勇

在河村鋪  
禦賊死

文童何希灝二月由徽州大營帶勇赴泗安偵探

路遇賊鬪殉難尋屍不獲 程富元都司三月在河南滑縣力

戰陣亡 汪長福都司六月在山東商河縣力戰陣亡 團丁

葉春發黃永義徐起福徐宗福五月在休甯蔡長發徐福蘇榮

升七月在合肥馬兵馬龍標十二月在巢縣東關均力戰陣亡

楊法孔二月在霍邱城內程長林程長元在六安陳士元三月

在廬州店埠孫鑄陶四月由江西行至樂平縣之官莊曹宗林

五月在休甯龔逢源在徽州府楊保八月在湖北巴河黃水生

十月在廣德州蓑衣塘黃金榮十一月在餘杭均遇賊被脅不

### 屈殉難

張翰江西南安府大庾縣典史兼理南安府經歷八年十一月

城陷隨生母趙氏與妻彭氏妾石氏及子器深器洪女大女富

女三女同時投塘殉節

江占先五品藍翎撫標左營儘先外委五月在定遠張吉祥額

州營王化集汎外委把總並營兵曹起發七月在廬州投效武

舉吳香桂右營把總祝長榮兵丁王吉祥盛啓發余啟發林太

林太有二  
一見前

張順王斌陳元炳余得勝在廬州別虞橋防江營哨

官李正元撫標兵李金亭余成龍何慶華王貴鄭貴李正太張

順余連升陳儒炳八月在梁園六品軍功孟蘭生在定遠山塘

右營兵丁余在江在六安州撫標馬兵儘先外委端木楨在壽州邵必貴安慶防江營記名哨官在宿松縣二郎河均力戰陣亡 盛時舉承襲雲騎尉補潁州府蒙城城守營守備調署廣德營都司十一月十一日帶兵勦賊於灣沚衆寡不敵力戰陣亡 撫院書吏江在庚游慶恩張克鷗在梁園大營賊復陷廬州僑省退守定遠遇害雷斌撫書六品頂戴在梁園守行轅被戕焚其屍

練長程安文與姪康耀避亂寄居霍山縣率衆據銅錢寨禦賊數年無恙六月賊力攻破寨安文自以領袖不肯退與妻王氏死寨中康耀見衆潰奮力抵禦陣亡妻胡氏持兵鬪中礮死洪

蘭階同時力門被戕洪東巖禦賊於霍山大滑嶺門敗死之

民人唐長青

長青有二一見前

二月在運漕方國茂在徽州吳擇善四月在無爲州楊德明十一月在舒城皆被脅不屈死

監生趙馥園丁潘貴於九年四月在天長縣登陣守禦力戰陣亡 儘先守備防江營把總甘全六月在定遠迎敵陣亡其家屬四口先於八年五月在定遠殉難原任撫標右營二司把總儘先千總雷春和五品藍翎在營儘先外委孫杰右營記名外委撫轅戈什哈成國才左營馬兵孫傑兵丁葛發李春發鄭國文孫要恒楊榮發楊榮升包得貴張世英團丁楊松柏均同時在定遠縣北郊迎敵陣亡左營儘先外委鄧弼七月在定遠攻



捻陣亡 撫標兵謝廷魁在店埠遇難江山太九月在夏閣陣亡 陳士寶十一月在霍山縣遇害

魯常字碩甫號蓮峯曾祖晉見宦業傳祖瓚見文苑傳父興諸生有文名常性孝友道光辛巳舉於鄉乙未用知縣不就改教職授江蘇睢甯訓導叔父受田年邁迎養至署事之如父孀姑幼子暨族姻諸生貧者皆周之至無資復應禮部試訓士誠懇重實踐以端氣習正文體爲務多士歸之倡興學宮一呼立應咸豐四年引退囊橐蕭然睢寧人士額其堂曰師表人倫僑寓徐州觀察使悉其清况薦主昭義書院講席三載皖垣陷遂僦居蘇州咸豐十年粵逆破蘇城先一日遣其長子驥携幼弟鵬

去賦絕命辭三章與妻姚氏及次女雅媛從弟壽昌同殉湖中時五月十二日也旋經江督曾國藩奏聞奉旨照陣亡例從優議卹如典禮著有唾餘草偶存草聊復爾爾吟各一卷又制藝一卷

李世楷字光徽武庠生與弟光耀寄籍滁州督辦團練屢敗賊於盱眙己未賊假官兵裝運軍械火藥突據州南世楷率練殲之無漏網者十年賊大股犯滁世楷戰敗及光耀皆被戕賊焚掠其屋廬以報世楷屍逾時不變人以爲忠義所感云

張振魁協鎮銜京都巡捕右營參將於十年隨親王僧格林沁在山東濟南府督戰力竭陣亡

一作直隸安定門游擊升用副將十一年隨親王在高唐州

葉廷芳藍翎守備隨營至桐城力戰陣亡 五品藍翎儘先  
補用把總王振啟在全椒勦捻受傷未愈奉委押官犯行至光  
州傷發身死 丁澤東六品藍翎候選從九閏三月在金陵江  
東橋大營辦理文案禦賊陣亡妻王氏寄居金陵鄉村聞耗殉  
節 饒功鑑藍翎五品軍功及文童饒功銓在金陵三汊河帶  
勇力戰陣亡民人白慎修及子文童白允階投効三汊河營同  
時力戰陣亡 文童孫吉奎四月在石埭營中被賊破肚慘死  
並被焚屍 舒坤二四品花翎八月在盱眙縣河石橋帶團力  
戰陣亡 劉德修臬書投効甯國營辦理糧臺城陷督兵護餉  
殉難 兵丁何祥發周義發姚啟發金克傳高升王國用十一

月在六安州陣亡

楊蔚生諸生三年赴廬州請師不應憤懣棄家產逃至杭州陳  
裕源諸生及子芳樹亦逃難僑寓杭州二月城陷皆殉難杭州  
旋復蔚生家屬求其屍不獲民人洪慎言李學華錢蘭臺皆僑  
居杭城不屈被戕陳長興及子全發張琢如與妻蔣氏皆自縊  
幼童王海棠儒士王兆魁之子也隨母舒氏避亂蘇州李昌  
疇在蘇州同里鎮城陷皆遇害楊友壽楊孟和六月在建德孔  
家村李萬林徐貴徐士二在休甯李宏任十二月在徽州皆不  
屈遇害

義勇丁萬福於十一年正月在祁門大洪嶺防所陣亡 張學

雲武生都司銜撫標左營千總候補守備吳長春五品頂戴撫標右營卽補千總隨巡撫翁同書駐壽州九月苗逆陷城巷戰陣亡劉晴波避亂僑居壽州城陷與妻張氏及妹並甥女同時殉難 陳韜字龍巖天姿英拔雅有襟抱書法出北魏古意盎然初隱於吏任湖北棗陽縣典史纂修棗陽縣志稱爲賅洽粵逆亂起湖南撫張亮基重其才移任山東招入戎幕多所區畫歷保至江蘇候補直隸州知州浙撫王有齡調赴杭州督辦團防十一年十一月浙江省垣再陷督勇巷戰陣亡未展其才時論尤加悼惜焉子珩候選知縣隨祖父廷弼在紹興府嵊縣典史任率勇練堵剿因父死於賊奮勇陷陣爲賊所獲毀其屍廷

弼亦受傷旋病故嵊人哀之爲之表請旌卹 龔銓六品頂戴選用從九在浙江省辦理支應甯國糧臺文案賊至與子乃俊乃輯登陴守禦城陷巷戰陣亡 張啓鴻候補衛千總漢得元安慶城守營外委漢傳模撫標書識均於金陵陣亡 馮華美馮長富張體貞七月擄至湖北麻城顏學元擄至黃岡北門陳長喜汪廷華劉系籽劉萬富至巴河何春華至蕪湖楊心友楊三林至池州府巴斗山均不屈殉難 程富林在蕪湖小湖灘錢家村遇賊鬥死八月徐毛保在廬江東城外寄居地方全家殉難

葛啟玲六品頂戴浙江歸安縣埭溪巡檢於同治元年五月在

任賊至不屈殉節僕某從死 兵丁龍以泉二月在陝西楊體

發楊體福

一作停福

張家順

一作學順

陸榮順三月在河南商城縣二道

河陣亡

謀煥文六品藍翎儘先外委元年春髮捻大股合圍

潁州府城奉令赴潁西偵探敵情倉卒遇賊投水殉難楊定邦

五品銜撫標儘先外委三月潁州解圍力戰陣亡 左營藍翎

額外朱連升馬兵饒連升在甯國縣陣亡陳明珠與衆禦賊於

溪西奮勇攻擊衆潰敗不支明珠赴溪水死程天榮被執不屈

遇害團丁范祿七月在箬嶺防守力戰陣亡六品軍功徐承先

八月在金陵陣亡 民人胡老和蔣老姜華長有閏八月在浙

江建德縣被擄不屈死 陳孔鏞議叙九品是年父策卒於河

南信陽州巡檢任所孔鏞隨兄扶柩旋里道經湖北應山突遇賊兄攜眷奔避孔鏞堅守柩不忍去賊脅之使相從曰吾父柩在此誓死不能離也賊怒斫之越十餘日死

石承慶投効臨淮毅字營以戰功歷保都司二年苗逆犯壽州

陣亡黃應期六品頂戴儘先經制外委把總及兵丁黃至和

一作

和玉四月在江陰楊舍鎮勇丁陳秉謨三月在嘉興府夜入賊營

砍其更夫賊覺殺之燬其屍陳歲奇在金陵九洲洲破賊營陣

亡陳朝義四月在水西門外中礮死入祀金陵昭忠祠沙啟貴

八月在江陰戴連升九月在無錫高橋劉盛清劉金山在無錫

洞庭鎮朱興發余進彬在焦店陣亡 汪植崙藍翎五品銜卽

選縣丞十月在金陵三汊河隨提督米興朝剿賊陣亡照知縣例賜卹於啟順隨營在上海陣亡 劉鸞鈞指發浙江候補縣丞在湖州府差次五月城陷隨庶母丁氏及妻沈氏兩妹大姑二姑女大姐同時殉難

邵維新字小魯以皖豫隨勦髮捻功遞保同治元年揀補貴州平越直隸州知州二年抵任兼攝湄潭縣事於遵義府城集團進勦攻克湄境賊巢援解龍泉縣城圍保以知府補用復委兼攝綏陽縣事月餘復委署遵義府事仍兼平越綏湄名印務時逆匪吳元彪劉名貴等已大股圍攻綏城倉空庫匱民情驚駭維新部署練民擊賊護割秋穀民心稍安相持二百四十餘日

身經百戰疊挫兇鋒外有援兵終不能擊開一路稍濟饑需斗米萬錢至捕鼠羅雀以食維新激以忠義民皆願死守迄三年二月外援營盤失陷賊益悉力攻城堵禦五晝夜各門皆陷乃令練民悉銳衝突出圍各逃生命維新獨留巷戰力竭陣亡事聞奉旨從優議卹並於死事地方建立專祠 兵丁賈元慶四月六日在常州陣亡 謝世選幫辦信字營務六品軍功充老湘營勇丁王家學勇丁潘繩武均於六月克復金陵陣亡 諡德才六品軍功七月在壽州移營行至夾山口遭風覆舟 民人吳昇榮於正月在歙縣西峯嶺遇賊不屈被害 陳步階守備於四年正月在貴池殷家滙巡緝遊匪以前受矛傷至是創

作死

馬森七品軍功隨開字新營辦理文案於六年四月十二日午刻在湖北安樂縣木落山戰敗遇害 同知銜知縣白正衛在

山東臺兒莊陣亡

王澤銘軍藍翎儘先守備七年在湖北黃安紫坪鋪打戰身受重傷隨營至山東東昌府章邱鎮七月十八日創甚歿於軍

署右營把總藍翎儘先千總姬文富在山東臨清州陣亡

楊秉燦字玉初四川補用知府八年十月二十二日督軍追勦猓夷在四川甯遠府西昌縣哄牛壩陣亡奉旨加太僕寺卿銜給雲騎尉世職並死事地方建立專祠 查士瑗候選巡檢遊

幕直隸祁州分督練勇堵禦騎馬賊是年正月於舍二村接戰陣亡

以上自咸豐二年至同治八年紳宦弁兵士庶在外省外府陣亡殉難共二百有四人又調赴湖南湖北兵丁及徐毛保

全家男婦俱不計口數附錄婦女三十七人

以上同治志王志行分纂

楊誼堅咸豐六年髮亂被擄至望江不屈死

陳有纓字正冠少聰穎賦性忠厚鄰里有饑寒者輒周濟不望報值咸豐八年髮亂父以年老不能行賊至劫財物正冠以身障父受重創死今人猶稱冠之孝行 汪奎軍營殉難

陳裕源附生咸豐十年投効浙營奉委巡城罵賊死子芳澍隨

同殉節

胡一壽字粹明咸豐十一年山口鎮遇匪逼降不屈匪義而釋之赴水死 附生胡英遇賊不屈死 耆民龔振發被擄至石鎮楊誼發楊誼強擄至潛山楊金培擄至山口鎮俱不屈被害何祥麟賊逼不降擄去被殺

吳香桂字時敏道光己酉武舉咸豐間統帶兩營屢立戰功每單騎出陣前爲賊所乘受傷回營三日創發死 王家渠參將破陝西回匪陣亡

徐子煥清光緒八年從戎臺灣充管帶十年十月初八日與日戰殉難

查連標號捷三副將光緒甲午從征朝鮮陣亡於平山

王郊字小宋性伉直工書能詩咸豐間以史館議叙補河南淮項沈分防縣丞改官直隸攝成安縣篆補用知府光緒乙酉援臺被法人執不屈死

舒景衡  
續纂

懷寧縣志卷十八

仕業

周禮大宰之職曰王以八柄馭羣臣一曰爵以馭其貴二曰祿以馭其富三曰予以馭其幸大丈夫生當斯世得時則駕所以比於畫錦之榮者詎不足以夸耀一時爲宗族鄉黨光寵哉然而門閭高大再過爲墟零落山邱無有能道其姓字者比比矣是故凡庸之所嗟嘆流俗之所畏懼聖哲視若浮雲達士譬之朝露豈必脫略軒冕以爲榮蜷屈蓬蒿以寄傲哉夫亦懼竊位倖祿無所樹立以自表見致與草木同腐爲大恥爾子曰不患無位患所以立又曰如或知爾則何以哉明道先生曰一命之



士苟存心於愛物必於人有濟士君子隱居求志行義達道蓋未可以揣摩塗澤之具脂韋挈楹之爲期自託於不朽邀榮名於沒世矣懷境於兩漢兼隸舒皖二縣其名賢宦績若文翁之化蜀朱邑之遺愛桐鄉周榮之風裁峻整仲嚮之英俊歸心久已彪炳汗青懸諸日月自後治行卓著代有傳人或緣經術以飾吏治或奮武衛以濟時艱咸能留愛甘棠見思草野於以垂光竹帛播諸無窮斯真爵祿之幸而閭里之榮也已後之君子思榮名之爲寶鄉先生典型在焉其亦有感而興矣

漢文翁

一統志名黨字仲翁

廬江舒人也少好學通春秋以郡縣吏察舉

景帝末爲蜀郡守仁愛好教化見蜀地辟陋有蠻夷風欲誘進

之乃選郡縣小吏開敏有材者張叔等十餘人親自飭厲遣詣京師受業博士或學律令減省少府用度買刀布蜀物齎計吏以遺博士數歲蜀生皆成就還歸文翁以爲右職用次察舉官有至郡守刺史者又修起學官于成都市中招下縣子弟以爲學官弟子爲除更繇高者以補郡縣吏次爲孝弟力田常選學官僮子使在便坐受事每出行縣益從學官諸生明經飭行者與俱使傳教令出入閭閻縣邑吏民見而榮之數年爭欲爲學官弟子富人至出錢以求之繇是大化蜀地學於京師者比齊魯焉至武帝時乃令天下郡國皆立學校官自文翁爲之始云文翁終於蜀吏民爲立祠堂歲時祭祀不絕至今巴蜀多文雅

文翁之化也漢書本傳文翁學堂于今猶在益州城內石室禮殿圖七十二賢比家語少公西與縣亶原亢公肩公夏首句井疆邾巽顏何八人而別有遽瑗秦冉林放三人文獻通考明時郡邑志文翁皆列郡學鄉賢祠

朱邑字仲卿廬江舒人也少時爲舒桐鄉嗇夫廉平不苛以愛利爲行未嘗笞辱人存問耆老孤寡遇之有恩所部吏民愛敬焉遷補太守卒史舉賢良爲大司農丞遷北海太守以治行第一入爲大司農爲人醇厚篤於故舊然性至公不可交以私天子器之朝廷敬焉是時張敞爲膠東相與邑書曰明主游心太古廣延茂士此誠忠臣竭思之時也昔陳平雖賢須魏倩而後

進韓信雖奇賴蕭公而後信故事各達其時之英俊若必伊尹呂望而後薦之則此人不因足下而進矣邑感敞言貢薦賢士大夫多得其助者身爲列卿居處儉節祿賜以共九族鄉黨家亡餘財神爵元年卒天子閔惜下詔揚曰大司農邑廉潔守節退食自公亡疆外之交束脩之餽可謂淑人君子遭離凶災朕甚閔之其賜邑子黃金百斤以奉其祭祀初邑病且死屬其子曰我故爲桐鄉吏其民愛我必葬我桐鄉後世子孫奉嘗我不如桐鄉民及死其子葬之桐鄉西郭外民果然共爲邑起家立祠歲時祠祭漢書本傳墓在今桐城縣西門外二十里土名石井鋪歷代修祀至今不絕據明郡邑志皆列郡學鄉賢祠班氏曰漢

興反秦之敝與民休息至于文景遂移風易俗是時循吏如河南守吳公蜀郡守文翁之屬皆謹身帥先居以廉平不至於嚴而民從化是故漢世良吏於是爲盛明知府胡纘宗安慶府志贊曰漢自高祖至平帝十二世而二千石以循良稱者才六人舒得二人焉於乎盛哉

以上二傳府縣舊志皆列名賢前志遺之今補

東漢陳衆廬江人建武中爲揚州從事李憲餘黨淳于臨等聚衆屯潞山揚州牧歐陽歆遣兵不能克衆請喻降臨於是乘單車駕白馬往說而降之潞山人共立爲祠號白馬陳從事據後漢書李憲傳今受泉鄉有白馬相公廟見祠祭書下補

周榮字平孫廬江舒人也肅宗時舉明經辟司徒袁安府數與

議論甚器之及安舉奏竇景及與竇憲爭北單于事皆榮所具草竇氏客太尉掾徐龔深惡之脅榮曰子爲袁公腹心之謀排奏竇氏竇氏悍士刺客滿城中謹備之矣榮曰榮江淮孤生蒙先帝大恩以歷宰二城今復得備宰士縱爲竇氏所害誠所甘心故嘗救妻子若卒遇飛禍無得殯斂冀以區區腐身覺悟朝廷及竇氏敗榮由此顯名自郾令擢爲尙書令出爲潁川太守坐法當下獄和帝思榮忠節左轉共令

共縣屬河內郡故城在今衛州共城縣東卽古

國歲餘復以爲山陽太守所歷郡縣皆見稱紀以老病乞身卒於家詔特賜錢二十萬除子興爲郎中興見文苑傳興子景景字仲嚮少以廉能見稱以明學察孝廉辟公府歷位守牧好

賢愛士拔才善嘗恐不及每歲舉孝廉延入後堂與共宴會如此數四乃遣之贈送什物無不充備既而選其父兄子弟事相優異常稱曰臣子同貫若之何不厚移臣作子於政何有先是司徒韓演在河內志在無私舉吏當行一辭而已恩亦不及其家曰我舉若可矣豈可令徧積一門景亦守河內故當時論者或兩譏焉景後爲豫州刺史辟汝南陳蕃爲別駕潁川李膺荀緄杜密沛國朱寓爲從事皆天下之英俊也徵入爲將作大匠及梁冀誅景以故吏免官禁錮朝廷以景素著忠正頃之復引拜尙書令延熹初京師游俠有盜發順帝陵賣御物於市市長追捕不得景以尺一詔召司隸校尉左雄詣臺對詰雄伏於廷

答對景使虎賁左駿頓頭血出覆面與三日期盜便擒也遷太僕衛尉六年代劉寵爲司空是時宦官任人及子弟充塞列位景初視事與太尉楊秉舉奏諸姦猾自將軍牧守以下免者五十餘人遂連及中常侍防東陽侯侯覽東武陽侯侯具瑗皆坐黜朝廷稱之視事二年以地震策免歲餘復代陳蕃爲太尉建寧元年薨以預議定策立靈帝追封安陽鄉侯長子崇嗣爲章帝孫甘陵王理相中子忠字嘉謨少歷列位累遷大司農與朱儁共敗李傕於曹陽後代皇甫嵩爲太尉錄尙書事以災異免復爲衛尉從獻帝東歸洛陽

末漢吳周瑜字公瑾景從孫也父異洛陽令從父尙丹陽太守

瑜長壯有姿貌初孫堅興義兵討董卓徙家於舒堅子策與瑜同年獨相友善瑜推道南大宅以舍策升堂拜母有無通共瑜往省尚丹陽會策將東渡到歷陽馳書報瑜瑜將兵迎策策大喜曰吾得卿事諧也遂從攻橫江當利皆拔之乃渡江擊秣陵破笮融薛禮轉下湖孰江乘進入曲阿劉繇奔走策衆數萬曰吾以此取吳會平山越已足遣瑜還鎮丹陽頃之袁術遣從弟胤代尚爲太守瑜與尚俱還壽春術欲以瑜爲將術觀術終無所成故求爲居巢長欲假塗東歸術聽之遂自居巢還吳是歲建安三年也策自迎瑜授建威中郎將瑜時年二十四吳中呼爲周郎以瑜恩信著於廬江出備牛渚後領春穀長頃之策欲

取荊州以瑜爲中護軍領江夏太守從攻皖拔之復進尋陽破

劉勳討江夏還定豫章廬陵留鎮巴邱

裴松之曰策時未能定江夏瑜之所鎮應在今

巴邱縣與後所卒巴邱處不同按晉巴邱縣在今江西臨江府峽江縣北

五年策薨權統事瑜將兵

赴喪遂留吳與長史張昭共掌衆事曹操新破袁紹兵力日盛建安七年下書責權任子權召羣臣會議昭與秦松等猶豫不能決權意不欲遣質乃獨將瑜詣母前定議瑜曰昔楚國初封荊山之側不滿百里繼嗣賢能廣土開境至於南海傳業延祚九百餘年今將軍承父兄餘資兼六郡之衆兵精糧多將士用命鑄山爲銅鑄海爲鹽汎舟舉帆朝發夕到士風勁勇所向無敵有何逼迫而欲送質質一入不得不與曹氏相首尾則命召

不得不往見制於人豈與南稱孤同哉不如勿遣徐觀其變若操率義以正天下事之未晚若圖暴亂不戢自焚將軍韜勇抗威以待天命何質之有權母曰公瑾議是也公瑾與伯符同年小一月耳我視之如子汝其兄事之遂不留質十一年督孫瑜等討麻保二屯縣其渠帥囚俘萬餘口還備官亭江夏太守黃祖遣兵入柴桑瑜返討虜其將十三年春權討江夏瑜爲前部大督九月操入荊州劉琮舉衆降操得其水軍船步兵數十萬將士皆恐懼權延羣下問計議者咸曰操豺虎也託名漢相挾天子以征四方拒之不順且將軍大勢可以拒操者長江也今已與我共之矣而勢力衆寡又不可論不如迎之時瑜令鄱陽

魯肅勸急呼還商之瑜曰操雖託名漢相其實漢賊將軍以神武雄才地方數千里兵精足用英雄樂附尙當橫行天下爲漢除殘穢今操自送死而可迎之耶操之內憂北土旣未安平加以馬超韓遂尙在關西豈能曠日持久來爭疆場且舍鞍馬仗舟楫與吳越爭衡非中原所長又今盛寒馬無藁草北方士衆遠涉江湖不習水土必生疾病此數四者用兵之患而操皆冒行之請得精兵三萬進住夏口保爲將軍破之權曰老賊欲廢漢自立徒忌二袁呂布劉表與孤耳今數雄已滅惟孤尙存與老賊勢不兩立君言甚與孤合此天以君授孤也因拔刀斫前奏案曰敢復言迎操者與此案同時昭烈爲操所破欲以南渡

江進往夏口遣諸葛亮詣權權遂遣瑜及程普等與昭烈并力拒操遇於赤壁操軍衆疾病敗退引次江北瑜等在南岸瑜部將黃蓋曰操軍方連船艦首尾相接可燒而走乃取蒙衝鬥艦數十艘實以薪膏裹以帷幕上建牙旗先書報操給以欲降又豫備走舸繫大船後引次俱前操軍士皆指言蓋降蓋放諸船同時發火時風盛猛悉延燒岸上營落焰漲天操軍燒溺死者無算遂退保南郡留曹仁等守之操徑北歸昭烈與瑜等進南郡與仁相對克期大戰瑜跨馬躡陣會流矢中右脅瘡甚便還仁聞瑜臥未起勒兵就陣瑜乃自興案行軍營激揚吏士仁由是棄城而走權拜瑜爲偏將軍領南郡太守以下雋漢昌劉陽

州陵爲奉邑屯江陵昭烈以左將軍領荊州牧治公安昭烈詣京見權瑜上疏請留之曰劉備以梟雄之姿而有關張熊虎之將恐蛟龍得雲雨非池中物也權以操在北當廣擊英雄故不納是時劉璋爲益州牧瑜乃詣權曰操新折衄未能連兵乞與奮威俱進取蜀得蜀而并張魯還據襄陽以蹴操北方可圖也權許之瑜還道於巴邱病卒

松之曰在今之巴陵與前所鎮巴邱名同處異時年三十

六瑜性度恢宏與人無忤程普頗以年長陵瑜瑜折節容下終不與較普後自敬服語人曰與公瑾交若飲醇醪不覺自醉初操以瑜年少密遣九江蔣幹說瑜幹布衣幅巾自託私行詣瑜瑜迎勞之謂曰子翼良苦遠涉江湖爲操作說客耶幹但笑終

無所言幹還稱瑜雅量高致非言辭所能間中州之士亦以此多之及卒權流涕曰公瑾有王佐之資今忽短世孤何賴哉後稱尊號歎曰孤非公瑾不帝矣瑜兩男一女女配太子登男循娶權女拜騎都尉有父風早卒胤封都鄉侯後以罪徙廬陵卒

以上二傳據後漢書三國志補

唐張鎮周舒州人武德五年自壽州都督移舒州都督始入舒就故宅召親戚與酣飲散髮箕踞如布衣時凡十日既而分贈金帛泣與之別曰今日鎮周猶得與故人歡飲明日則舒州都督治百姓耳諸公禮隔不得復爲交游自是親故犯法一無所

縱境內肅然

本太平御覽資治通鑑前志入職官

明吳昇字亨晦宣德癸丑進士擢工科給事中有直氣遇事敢言正統間廷議郡縣守令聽大臣舉薦昇以爲可暫而不可常否則受官公朝拜恩私室矣又議大臣舉御史昇以爲御史旣被大臣薦則大臣有不法御史肯背私恩而抗公言哉咸奏止之其他封駁糾正多類此閩浙礦徒爲亂殺福建竺參議擢昇浙江布政司右參議往辦賊昇至購捕其酋斬之廉得都指揮以下數人失機狀奏寘之法賊黨破散後致仕歸祀鄉賢葉華字廷輝天順丁丑進士授山東沂州知州沂民夙苦逋賦疲於轉輸華區畫得宜民賴其惠武弁侵暴抗疏裁抑俾不得逞甫一歲政績炳然尋以疾卒百姓追思立祠祀焉



程亨字彥達天順末國子生爲監察御史按河南持憲得體擢

江西按察司僉事分巡南贛時贛盜方熾亨身嬰鎧入山擒

捕盜平復奉勅視學品士人服其公祀江西名宦郡祀鄉賢府舊

志藝文載程亨請撤寧藩護衛疏內已具英宗廟號則英宗以後作也按明史寧藩列傳及原傑傳俱載寧王奠培以淫亂事奪護衛徐文溥傳云曩因寧藩不靖英廟革其護衛是寧藩護衛英宗時已革不應英宗後復有此疏自係贗作

李璉字純夫成化己丑進士授浙江蘭谿知縣歷太僕寺丞擢

江西贛州知府時贛水疫繼作璉拯之惟恐弗及民乃獲甦閩

盜越境殺郡丞璉爲繕城治兵後歲餘盜滅詔逮失事者璉以

功免章祭酒懋修蘭谿縣志稱璉剛介有爲治行著聞蘭谿民

有來何暮去何速之謠入名宦祠祀焉郡祀鄉賢子楫

李楫字濟之宏治乙丑進士纂修孝廟實錄授江西南昌府推

官擢監察御史按山西搜剔宿弊忤當道謫判沔陽移泰和知

縣從贛撫王守仁平逆濠之亂歷浙江寧波府同知擢貴州參

議時芒部不靖協贊臺臣往征之賊平錄功有白金文綺之賜

尋乞歸楫雅意吟詠有盛唐諸作者之風古文亦冲淡明爽

余順字天助始爲巴陵人明初祖某從軍來皖遂家焉順中成

化乙未進士授浙江吉安知縣視縣政一切便民者攘臂爲之

略不辭難創學宮建倉廩鋤强暴恤孤貧多有可稱以勁介忤

當道謫戍遼陽尋放歸祀鄉賢

柯忠字汝節成化乙未進士授河南鞏縣知縣有善政擢監察

御史歷陝西按察司副使忠居官抗直敢言不俯仰時態告歸  
二十年卒

段恢字汝寵成化丙午舉人授河南裕州學正恢能以恩義結  
士子誘勸策惰士風翕然變至今裕人猶歌思之祀鄉賢

劉浦字公濟紹興通判鈺字宏治庚戌進士授翰林院檢討坐  
事除名以薦起爲湖廣布政司照磨遷麻城知縣麻城素梗且  
多豪右溥開誠布公慨然勤恤民隱尤惓惓於鋤強故民樂其  
治而豪家病其直然麻城有善政自溥始矣祀鄉賢

丁楷字汝正宏治乙未進士授江西金谿知縣母憂服闋補桐  
廬縣治俱有聲行取入都擢湖廣道監察御史直聲振一時巡

按廣東彈劾不避權貴風裁肅然占城故王古來之子沙古卜  
洛遣其叔父沙係把麻入貢請封命給事中李貫行人劉廷瑞  
往貫至廣東奏請如往年古來故事令其使臣領封廷議令亟  
往楷奏占城自古來被逐後竄居赤坎都國非舊疆勢不可往  
况古來乃前王齋亞麻弗庵之頭目殺王而奪其位王有三子  
其一尙存義不可封律以春秋之法雖不興問罪之師亦必絕  
朝貢之使自天威命不可不慎奏入廷議從之載明史外夷傳  
卒於官藩臬往弔視囊橐索然曰真御史也

吳鯉字耀如正德庚午舉人授江西樂安知縣調河南獲嘉縣  
獎拔寒士峻絕權要轉山西大同判復擢知蔚州以廉稱如一

日總兵官劉定之以罪誤論死待罪軍門觀者鬱鬱稱冤鯉生  
平與劉未謀面卽入見大吏備陳輿論之公力爲解救得未減  
踰年歸里劉餽以金堅拒不受卒贈桂林知府祀鄉賢  
於惟一字德夫嘉靖癸丑進士授南工部主事守閩嚴愼迺上  
所寵方士陶仲文夜欲斬關出惟一繫其舟不得前陶大沮喪  
御史吳時來劾嚴嵩被謫出都惟一與祖餞泣別嵩銜之出爲  
山西太原知府值歲荒民相食盡力賑濟全活甚多皆相呼爲  
於家兒直指按部婪索無厭惟一卽日掛冠去士民奔赴院門  
羣呼還我於守晉王疏狀懇留尋擢陝西副使爲巡撫王懷邦  
所構歸事載太原名宦志

劉坤嘉靖己酉舉人翰林溥之孫性抗直任湖廣荊州府推官  
張居正歸葬其父巡撫某麻冕加絰杖哭甚哀坤獨弔服如常  
儀以見忤歸

蔣建嘉靖乙卯舉人授江西建昌知縣遷饒州府同知饒有磁  
窰權要購求無已屢爲民患建一切禁罷饒民德之立祠祀焉  
以兄老乞休年八十二卒兄延年九十六

吳宗周字文甫參議昇之孫也嘉靖丙辰進士授湖廣黃州府  
推官黃岡陶仲文時以方士貴幸大吏嚴事之偶有所囑託宗  
周曰匹夫熒惑天子罪無赦乃敢撓天子法耶陶深銜之然無  
以難也後補漢陽時景王初之國多請莊田侵入田土湖陂數

萬頃又取薪稅於漢陽之劉家壩宗周持不與上書於王略曰高皇帝封諸王本支相輔然頒祿之外尺寸土不以私焉蓋不以親親故奪民也今王始受封而所爲若此違高祖約非孝且一彈丸土上賦之王亦賦之而使民不安其居商旅不行盜賊滋起於以上聞亦非大王福也王不聽宗周竟以獲譴歸復起爲戶部主事拜命而卒黃人祠之學宮漢陽人亦肖像祀焉宗周邃於經術著有易意四卷郁峯存稿四卷子嶽秀 嶽秀字幼鍾幼穎異喜錄古人嘉言懿行萬歷庚辰進士授中書舍人與同年顧憲成等五人講學東林以道德文章相砥礪世號爲一時鷹鳳遷禮科給事中二十一年因星變疏請蚤定國本略

曰臣聞天人之際影響不差未有不召而自至之災亦未有已出而無應之變臣伏思宗廟社稷之重察安危理亂之機蓋今日朝政所繫無有大於建儲者矣皇上册立之文業已炳如日星傳播九有今一更而爲並封再更而爲待嫡明明天子命令不一後有詔旨其誰信之奕者舉棋不定不勝其耦天下大器也計不夙定言不果行危疑之間隱憂伏焉其能保耳屬於垣者之無所觀望哉望影知形察微知著不可不防之豫而貽以安也賈誼曰天下之命懸於太子太子之善在於早諭教今皇嗣十有二齡猶然居於深宮之中長於婦寺之手九廟神靈垂統謂何兩宮聖母屬望謂何吾恐皇上之心必有不容一日安

焉者矣夫君與天一體也皇上且不得自安而欲天之以吉祥見以休徵應有是理哉伏望幡然改命毅然轉圜册立講學一時並舉繼祖宗燕翼之謀是為順孫體兩宮屬望之心是為孝子及皇嗣養正之期是為慈父答四海殷切之仰是為仁君然而嘉祥不臻妖星不滅者未之有也又疏彈貴戚鄭成憲直聲震朝廷上嘗宣入便殿賜硃半錠扇四柄蓋特恩也卒以忤權貴出為河南右布政兼按察使僉事甫期月陳疾歸改號遜齋築室講學以終門人私諡為直方先生祀鄉賢

段志理學傳江南通志稱嶽秀

歷任藩臬立身端介嘗大書偶語於室以自儆曰儼龍見於尸居小心翼翼聽鷄鳴而早起為善孳孳

汪漢字淵之嘉靖癸未進士授南京戶部主事歷工部都水司

郎中刷剔幣寶裁節浮費擢湖廣永州知府時猺獠構亂漢請兵征之事未竣以病歸卒論功賜鏹幣於家

韓棟字遯高嘉靖辛酉舉人授湖廣江夏知縣簡素不媚上官為張居正所重諸臺司因頗譽之一日居正子過江夏大吏宴之黃鶴樓屬令治具視公子所欲必致之惟懼令之不備無以結懽公子令固不懌又數數以事語令棟醉扣几而歌嗚嗚卽起解衣冠下階趨出呼從者促治裝吾且上書乞骸骨也撫按強留之不得竟歸以酒自娛恥與里中少年伍曰吾老不耐揖拜一日去城三十里得蘧廬而止耕鑿自給不入城市三十年祀鄉賢長子一元歲貢生次仲琦武進士次一光 一光字麗

陽崇禎戊辰進士由行人考授監察御史時璫燄雖熄二三漏名者尙柄用一光廷叱之疏十上列其奸賄賜對平臺一光義激愈憤上特諭紀註出按蜀爲權貴人所憚改浙江按察僉事尋以參議備兵紹台擢大參移治兵濟南前按蜀時所劾吏俞上猷方穢臺班竟誣一光前事激時宰落職歸一光爲御史時疏皖城宜預增兵餉當事不能用俄賊兵犯境師徒撓敗始恨不用一光之言

劉尙志字士行父釗耿介有積德尙志中隆慶辛未進士授廣東歸善知縣以內艱再補浙江山陰素質直不事干謁餘姚孫鑛以司銓入都諸邑競迎欵尙志獨簡淡待如常賓孫嘉歎而

去因薦尙志爲御史時張居正柄國持法嚴尙志首上緩刑一疏鄒元標劾居正奪情罪不測尙志復疏力救歷江西少參浙江海道選將練兵造戰艦爲防倭計甚悉按察福建轉山東左布政致仕歸葬父躬壘土負石哀聲徹林谷墓木生連理枝人咸以爲孝感年八十餘卒祀鄉賢齊越皆祀名宦子十二若寵福建都司平山賊有功若實見儒林傳若寅諸生若宰若宜自有傳 若宰字元平崇禎戊辰上親策士擢若宰第一命中使覆若宰卷雜置諸卷中上焚香抽取仍得若宰卷喜諭廷臣曰眞狀元也授諭德充日講官嘗進講修己以敬章反覆陳說上微倦倚御座一足著膝若宰乃芻引五子之歌曰爲人上者奈

何不敬上動容爲端坐聽之時楚寇張獻忠就撫詔居穀城若宰薦江寧簿阮之鈿爲穀城令備之又薦安池道史可法智勇忠介具經濟才可皖撫上並嘉納以母疾疏乞終養上特賜銀幣馳驛歸遭母喪未幾卒贈詹事賜祭葬廕子後以子餘璫仕加贈太僕少卿祀鄉賢

舒塗隆慶間由貢生任江西九江府通判有惠政以骨鯁忤權貴歸

容若玉萬歷甲戌進士授直隸晉州知州創建書院進諸士講肄彬彬有齊魯風歷擢江西嶺北道值岑賊嘯聚廣中和平諸境賊黨李珍等聲趨贛勢張甚若玉以兵扼大龍保要害而偵

賊出寇截其歸路遣謀者火其巢賊失據一戰縛之後以積勞成疾卒

任可容字子賢萬歷丁丑進士授中書舍人轉工部員外郎尋擢浙江處州知府屬邑有以香蕈進者中匿金可容懲解役遣之遷廣東惠潮道嚴飭武備壁壘改觀一創倭於碣石再創倭於南澳廣東賴之有出海船三十餘艘稱係總督家丁者可容曰此詐也豈有大臣而縱奴行私者哉盡逮置諸法又於南澳獲洋商五十四人總督誤以爲賊可容力白其冤釋之轉本省鹽屯道卒祀鄉賢子國楨 國楨字士彥萬歷庚戌進士授戶部主事尋改南戶部督淮安稅務遷江西袁州知府袁故多盜

國楨下車集百姓訓誡勤懇有犯者諭歸其父兄自治期年萑苻無警時魏璫用事以書相招卒謝絕不與通擢山東兵備道崇禎己巳京師戒嚴國楨入援特簡湖廣按察使尋以母老終養歸母歿服除踰一日卒祀鄉賢

葉隆光復姓聶萬歷庚辰進士授福建閩縣知縣擢吏部驗封司主事遷文選司員外郎同萬國欽鄒元標疏諫蚤定國本削籍歸卒光宗立詔求當日言事獲罪諸臣贈隆光太僕寺少卿

按明史萬國欽鄒元標俱無疏諫蚤定國本事惟吏部尚書陸光祖以推用饒伸萬國欽忤旨文選郎王教以下盡逐見光祖本傳又見萬國欽傳是葉隆光坐推國欽仲斥罷未如舊志所云

汪道亨萬歷癸未進士授戶部主事擢福建泉州知府遷福州

兵備道時兵民相嚙幾釀大變道亨立召至諭以禍福遂各解散轉江西分巡道奸民有以煤礦報者中璫將圖開採力止之事得寢再轉廣東按察使搜理舊案多所平反遷陝西布政使歲大饑檄州縣議立常平公廩社倉諸法全活甚衆晉應天府尹尋以都御史巡撫宣府馭邊安靜不開釁邀功六年士馬晏然卒贈兵部尚書廕二子賜祭葬

楊材字遜生萬歷己丑進士授福建漳浦知縣始漳民頑悍訟曲者輒食斷腸草材令焚草以代鈞金訟者多得全活擢戶部主事嘗奉帖給散京衛軍餉刺胥吏無所尅減每散一營畢懽呼動地聲達禁垣上傳旨問知爲楊主事散餉得軍士心遷吏



部考功歷文選司員外郎條銓政四例次第施行以執法忤當  
軸歸光宗立起南太常少卿轉左通政卒祀鄉賢

阮以臨字榮所幼孤奉母教惟勤母歿每除夕必墓宿推弟千  
金產無吝色萬歷戊子舉人授廣東普寧知縣又攝新會篆所  
至有惠政轉欽州知州以臨少負豪傑概以軍旅自任總督葉  
夢熊征寧夏疏薦偕往以母老力辭不赴及在欽州欽與交阯  
鄰以臨撫伏波銅柱慨然有經略邊徼之志未幾卒祀鄉賢

江夢鶴字懷天南平知縣見龍子萬歷乙卯舉人署泰興教諭  
程士有法晉江西廣信府同知嘗按戚南塘遺法勒部選材以  
儲可用監司金之俊雅重之歷署上饒玉山鉛山諸巖邑所至

有聲以清理潛弊忤上官意遂歸崇禎末皖敝於兵夢鶴避居  
崑崙嵒寇退復移家於皖清初以遺佚薦不起子同淇同海皆  
進士別有傳

汪游龍字六御崇禎辛未進士授廣東靈山知縣靈山接壤交  
阯蠻戶黎人時煽爲亂游龍至練兵設險民賴以安調番禺值  
海寇劉香老人犯親決戰不避矢石香老卒成擒擢監察御史  
按閩時黃道周以劾楊嗣昌被謫游龍力疏救之卒之日僚屬  
往殮惟敝衣數襲咸爲泣下子宗周宗魯別有傳

戴昶字無睢崇禎辛未進士授工部主事時皖連苦寇禍耆老  
叩閭請蠲昶爲草疏上之得旨緩徵皖人至今稱德遷山東濟

南道士寇李雲擁衆數千大肆焚掠乘練兵堵勦每以少勝衆擒賊渠四十餘人賊遂平轉山西提學道卒年三十九

倪藻字華陽以監貢判蜀之蓬州蓬古宕渠地民素黠藻孜孜迪民於善家諭而戶曉之蓬民寢多向化久之能聲日著在任卒

顏渾字伯通崇禎庚辰進士召對稱旨授吏部稽勳主事尋改文選主事嘗憤要津持銓司短長不得自行其意倣宋范仲淹百官圖將中外大小文階除授淺深分註小冊每朝賀燕會遇有囑託者卽發冊視資合否爲依違與援者慙沮擢稽勳員外郎予告歸乙酉夏棲止宛陵山中作筠溪百咏慷慨激烈皆祝

宗祈死之意卒得疔疾不食月餘歸里一日卒著有司銓疏草養慵堂文集詩集數十卷

宣國柱字若木崇禎庚辰進士召對稱旨擢兵科給事中連上十餘疏咸得溫旨卒遭讒置之理詔再鞠得予昭雪以母老歸隱於太平山中居平欵歎時事恒泣下沾衣曰吾以老母故欠先皇一死後居母喪竟以毀瘠卒國柱資敏學博所撰古文辭淵源荀勗四部上下於北地瑯琊之間詩亦取材騷雅

汪鉉字以玉永州知府漢之曾孫少工制藝天啟辛酉舉於鄉屢薦春官得而復失者三署教諭高淳多所成就同邑顏渾宣國柱俱以召對稱旨領清要於是鉉老矣兩人欲薦起鉉鉉不

顧後於癸未成進士得授行人也

程泰亨字子治縉雲知縣敬思子以歲貢任解州學正州守扑

士令士因首質成泰亨抗言責守無禮謝職歸

以上前志江爾維分纂

朱敏嗣字兼五頗工詩善行書永歷時以諸生參江督呂大器軍謀用功貢授衡陽教諭中湖廣丙戌鄉舉賢相嚴起恒奏授中書舍人歷粵楚軍中改御史監焦連曹志建軍守正不媿阿於疆帥張居正之子同敞尤重之擢僉都御史方受命桂平陷上奔南寧敏嗣崎嶇走賀縣入志建軍中鼓厲志建固守不降

未幾以疾卒

據王夫之永歷實錄補

以上文職

明馬聚成字萃有山西大同府雲內州永豐鄉人元至正十年

因亂播遷揚州路全椒縣高城十三年太祖下滁州虹人鄧愈歸之授管軍總管聚成投充先鋒與元兵大戰敗之隨拔和州渡江克采石取太平等處洪武四年伐蜀愈赴襄陽練軍調聚成成都右衛百戶撥漢州屯守正千戶所授世襲武德將軍勅命十一年調成都左衛指揮使司征松疊等處十二年克小信等處十四年征雲南攻克草葛洞等處調守安慶歿於官封明威將軍子孫因家焉子二長禩次景安 禩隨父征討襲任百戶洪武十七年起取幼官家小赴京支俸紀功二十年欽授錦衣衛千戶三十三年大寧歸順奉天征討三十四年北溝河等處逐年大戰全勝有功欽授大同後衛世襲指揮僉事永樂八

年迤北征戰進至飲馬河等處節次有功宣德五年欽任中都留守司署都指揮僉事六年命鎮守密雲正統元年奉勅放回安慶養病年八十餘矣二年長子允贊襲授皇陵衛指揮僉事世職 景安字紳平與兄禴俱隨父征戰所至有功遷千戶所正千戶調守安慶誥封武德將軍

前志職官傳

柳昇懷寧人襲父職爲燕山護衛百戶大小二十餘戰累遷左軍都督僉事永樂初從張輔征交趾破賊魯江斬其帥阮子仁等守鹹子關賊入富良江舟亘十餘里截江立寨陸兵亦數萬人輔將步騎升將水軍夾攻大敗之獲僞尙書阮希周等又敗賊於奇羅海口得舟二百部卒得季犛及其子澄升賚露布獻俘被賞賚師還封安遠伯祿千戶予世券七年同陳瑄帥舟師巡海至青州海中大破倭追至金州白山島而還明年從北征至回曲津將神機火器爲前鋒大敗阿魯台進封侯加祿五百石仍世伯爵出鎮甯夏討斬叛將馮答蘭帖木兒等召還總京營兵十二年復從北征將大營兵戰忽蘭忽失溫以火器破敵十八年蒲臺妖婦唐賽兒反命升與都指揮劉忠將京軍往勦圍其寨升自以大將意輕賊賊乞降信之夜爲所襲忠中流矢死賽兒遁去及明始覺追獲其黨百餘人都指揮衛青力戰解安邱圍升忌其功摧辱之徵下獄已得釋二十年復從北征將中軍破兀良哈於屈裂兒河予世侯帝五出塞升皆從數有功

寵待在列侯右仁宗卽位命掌右府加太子太傅宣德元年冬成山侯王通征黎利敗聞命升爲征虜副將軍充總兵官保定侯梁銘爲左副總兵都督崔聚爲參將尙書李慶贊軍務帥步騎七萬會黔國公沐晟往討時賊勢已盛道路梗絕朝廷久不得交趾奏報二年六月有軍丁李茂先者三人間道走京師言昌江被圍急帝授三人百戶勅升急進援而昌江已於四月陷九月升始入隘留關利僞爲國人上書請立陳氏後升不啟封以聞賊緣途據險列柵官軍連破之抵鎮夷關升以賊屢敗易之時李慶梁銘皆病甚郎中史安主事陳鏞言於慶曰柳將軍辭色皆驕驕者兵家所忌賊或示弱以誘我未可知也防賊設

伏璽書告誡甚切公宜力言之慶起強告升升不爲意至倒馬坡與百餘騎先馳度橋橋遽壞後隊不得進賊伏四起升陷泥淖中中鏢死升質直寬和善撫士卒勇而寡謀遂及於敗升敗沐晟師不得進亦引還王通孤軍援絕遂棄交趾朝議以升喪師不令子溥襲爵久之乃許正統十二年贈升融國公諡襄愍溥初掌中府出鎮廣西廉慎然無將略承山雲後不能守成法過於寬弛猺獠相煽爲亂溥先後討斬大藤峽賊渠破柳州思恩諸蠻寨而賊滋蔓如故景泰初兵事亟召掌右府總神機營事定復出鎮天順初召還防宣府大同累進太傅陝西有警命佩平虜大將軍印往禦敵再入涼州溥閉壁不出敵飽掠去躡

取數十級報捷被劾落太傅閒住尋復起掌神機營卒諡武肅  
孫景嗣景文文子珣凡三世皆鎮兩廣有平蠻功嘉靖十九年  
命珣佩征夷副將軍印征安南莫登庸登庸乞降加太子太傅  
又以討瓊州黎賊功加少保卒贈太保諡武襄傳至明亡爵絕

明史本傳

汪澤原籍鳳陽祖盛從太祖戰鄱陽有功又摧王保保於河外  
官都閩奉勅鎮兩廣道經皖卒賜葬於皖之廣照山因家焉贈  
光祿大夫柱國前軍都督宣德間澤屢著戰功仕至後軍都督  
府都督世襲都指揮使隸荊州衛子孫留皖者至今奉祀不絕  
黃應甲明志不知何許人按舊志應甲實懷寧人今樅陽門內都督坊尙存舊志應甲字汝第少爲百夫長禦倭於姑

孰多上首功中嘉靖壬戌武會試

隆慶中以擢梧左參將從俞大猷討平章銀

豹進秩二等萬歷五年屢遷浙江總兵官改鎮廣東龍川鮑時

秀者妻杜氏有妖術

毛奇齡蠻司合誌下有嘗劫河源歸善博羅諸縣殺掠官吏

乃據義都

縱嶺立二千四方大總自號無敵峒王既降復反應甲討平之  
蠶戶蘇觀陞周才雄招亡命數千人縱掠雷廉間殺斷州千戶  
田治應甲率五軍並進生擒觀陞才雄斬首四百餘級其黨縛  
酋長陳泉以降未幾梁本豪復亂本豪故曾一本黨亦廣海蠶  
酋也一本死本豪竄海中習水戰遠通西洋且東結倭兵爲助  
殺千戶掠通判以去十年六月總督陳瑞與應甲謀分水軍二  
南駐老萬山備倭東駐虎門備蠶別以兩軍備外海兩軍扼要

害水軍沈蜚舟二十生擒本豪諸軍競進大破之石茅洲賊復奔潭州沙灣聚舟二百及倭舟十相犄角諸將合追先後俘斬千六百有奇沈其舟者二百及倭降者二千五百帝爲告郊廟大行叙賚應甲等進秩有差他倭寇瓊崖應甲斬首二百餘奪其舟再賜金旋入僉左將軍府罷歸卒以上明史本傳子宮聲襲職指揮僉事以平劉汝國功晉指揮同知詳具瞿九思三朝武功錄楊大烈字鎮西安慶衛人襲指揮世職以輓曹功擢淮安遊擊適河決徐州大烈率士卒躬任畚鍤逾月決口塞白蓮賊擾山東大烈堵禦有功擢吳淞副將尋升後軍都督同知以上武職前志江爾

維分纂

清孟命世字淑子明參將振邦子順治戊子王師征江西譚將軍大徵辟茂才擢第一參贊軍務以功授九江知府九江負固軍中下屠城令命世急請得免有誣首士民數百人通逆者悉取其狀焚之移守瑞州瑞自兵荒後民多逃亡有秋陂坑者跨連四郡遭寇焚掠尤慘命世招集安定具有方略郡以大完瑞人素苦浮賦單騎履畝繪圖申免浮糧數萬石載瑞志紀功傳年未三十拂衣歸命世天性孝友先是乙酉城潰父振邦捐軀殉節弟輔世安世尙幼俱被掠徒步數百里尋訪數陷大澤中幾斃竟以誠感悍卒得贖歸撫養訓誨卒皆成立解組後居林下五十年高風亮節爲時推重年八十二卒著有四書晰義彙

編類姓纂律陶覆瓿詩集祀鄉賢子銓字亦山雍正丙午舉人  
江寧縣教諭著有寒葵詩集

李寧和字文豹順治戊子拔貢生仕廣東韶州府翁源縣知縣  
時鍊脚苗逆鋒起甚爲民害因極力設法擒斬之後遷瑞州府  
同知赴任舟行孤泊逆夥伺其後箭如雨下遂被害姪儵庠生  
年十八及眷屬僕從與難者十餘撫臣奏聞勦其黨加優卹祠

名宦補

蕭蕙字叢玉性孝友接物謙和鍵戶授徒不與外事領順治庚  
寅歲貢薦任北直寶坻知縣多惠政營築渡濟民民稱便焉學  
宮久廢捐俸修葺詳請升縣爲大學撫按交章薦廉能第一以

二親未厝決意乞休棲止龍山罷伯屢請鄉飲爲僎賓焉年七  
十餘卒寶坻人追思之崇祀名宦子瓊璿皆文學瑛明經補

黎民貴字天錫諸生父洋早孤孝事孀母奉兄治如嚴父里中  
稱之民貴以順治戊子應征南譚將軍辟特用江西南康丞改  
廣信丞擢廣信知府寬厚愛民不事武健嚴酷歷權糧鹽海驛  
巡守諸道篆望誤歸康熙甲寅隨征陝西題補洮岷道卒同時  
以特用官者盛自新九江府推官以廉靜稱程咸修都昌知縣  
晉修瑞昌知縣兄弟並有循名孟學遷樂安知縣後死於賊賜  
祭葬併廕

汪宗魯字子鳧御史游龍子順治壬辰進士授浙江縉雲知縣



時山賊竊發宗魯立撲之不大創而靖擢山西沁州禦荒有法  
晉禮部員外郎卒

任竣字松翰順治乙未進士授戶部主事奉差督理淮閘復補  
版漕差大通橋再管通州坐糧廳搜剔馭弊革陋規二萬餘兩  
擢河南驛傳鹽法道缺裁補廣東南韶道勸農桑輕徭賦平反  
大獄偵緝巨盜多著能績奉檄勦番禺南海新會諸縣賊矜釋  
無辜居民德之以署篆者詐賊不遂被誣解職尋得白乞歸卒  
著有勞人草草集子奕鏊南安府同知奕鏊河間知縣

任塾字克家幼爲名諸生乙酉城潰父爲賊執將見殺塾疾呼  
曰爾殺我勿傷我父賊異之父得脫順治丁酉舉於鄉康熙丁  
未進士授直隸三河知縣地經亂學廟傾燬塾至卽大治殿堂  
門廡爲立鄉賢名宦祠尋擢知磁州命工修學率博士生講讀  
如三河內召爲戶部員外郎中督學轉禮部郎山左著清廉聲  
爲直省學使冠歸卒宦遊之地皆祀名宦著有遂初堂詩文集  
四卷子奕鏊進士官至大理寺少卿

倪适蓬州判藻之孫父孔章篤志力學事庶母以孝遇族里貧  
乏推解無德色适中順治己亥進士授浙江平湖知縣剛方耿  
介不爲脂韋解組歸遇地方有利病直言無所顧忌皖革糧里  
适力主其議有阻之者輒義形於色里人至今稱之

王尹字亞衡孝廉廷生子順治辛丑進士任廣東順德知縣縣

繁劇甲於東粵尹下車一切供億不取辦里戶而常賦之外嚴絕羨耗縣民德之又縣多盜尹密購踪跡立時擒治人以爲神在任三年卒

阮涵字子靜順治戊子舉人授襄陽推官缺裁改陝西中部知縣力行惠政山中有百歲老人命兒孫肩輿詣縣請涵出熟視不忍去曰昔有某令亦江南人甚仁慈廉恕距今七十年餘乃復見於公也晋工部主事卒子懋棠自有傳孫無忝康熙戊午舉人任興化教諭

洪五典字爾敷以歲貢任青陽訓導時青陽數十年無登科者五典勤課諸生亟賞吳襄洪有依及十齡童子王有汲許以大成後吳捷南宮入中秘爲名臣洪與王俱登賢書在官四年不受生徒修脯以疾歸卒孫聯斗康熙辛卯舉人

孟安世字康子康熙己酉舉人任邳州學正邳遭河決城壞學宮湮沒安世捐俸創東廡祀先聖先賢焉舊志多有闕者搜輯散佚得爲成書請復優免銀佐士子膏火又邳民濱河夫柳之征奔命極苦靳中丞輔過邳安世力爲請得免役著有寒燈閣詩存讀書堂外內集

江同淇字瞻斐廣信同知夢鶴子少爲諸生避亂於濼之崑崙堡時土寇以萬人來攻同淇率衆拒守五閱月而堡卒無恙康熙庚戌進士授直隸新城知縣以廉幹爲直撫于成龍所重坐

盜案鐫級部議開復決志歸

錢選字枚一少喪父事母備極色養嘗構園萬松山上奉母遊觀西望愚公峯父墓在焉名曰陟園因侍母之陟得名矣康熙乙丑進士授廣東茂名知縣課士勸農興利剔弊歷有治聲歸里後著理學心源家禮纂要等書尤長於史學有讀綱目九法祀鄉賢

楊汝穀字令貽康熙庚辰進士授浙江浦江知縣廉平有異政縣大疫汝穀虔禱於神病者或署其姓名辟之輒愈內擢爲禮部主客司主事轉祠祭司員外郎儀制司郎中遷四川道監察御史巡視東城奏劾河南南陽鎮縱兵毆官特命重臣往按得

實悉懲以法總兵以下論如例又奏言五城司坊官巡盜安民責任匪輕請照外員計典俸滿三年清廉材幹者五城御史呈明都察院核薦有干八法者亦照例處分庶微員知所勸懲又奏免榮澤縣濱河地畝錢糧五百九十餘頃罷河北太河山香稅歷掌京畿江南浙江等道遇事盡言持大體擢太常寺少卿遷奉天府丞提督學政晉右通政雍正元年命祭告炎帝少昊帝帝堯帝舜陵先師闕里廟連擢通政司通政都察院左副都御史二年晉兵部右侍郎五年轉左侍郎營汎驛踣積弊一清命祭告河神復奏堤堰濬築事宜俱稱旨己酉充順天鄉試正考官癸丑會試總裁官校士有法稱得人焉詔許紫禁城騎馬

乾隆元年命祭告南嶽轉戶部左侍郎晉左都御史三年以衰病屢疏乞休溫旨慰留瀕行詣闕謝恩上令左右扶掖勿拜賜絨結頂帽並御書楹聯賞賚甚厚既歸予食原品俸時傳諭勞問又二年年七十六在家卒上聞震悼賜祭葬諡曰勤恪汝穀以老成忠讜旁無薦舉受三朝特達之知履卿貳十餘年無毫毛過差所謨謀皆經國大計上眷任益隆海內方望爲相不賴寵以老而歸朝野嘉嘆以爲成德卒之日郡人請祀鄉賢浦江人亦祀之著有靜齋詩集十五卷家塾邇言一卷子繩孫貢生以保舉至江西瑞州知府振翰康熙戊戌進士綏欽賜舉人世承乾隆丙辰舉人廕主事現廕生任形部督捕郎中孫十餘人超恒大觀別有傳餘多仕至牧守官

楊一元字長四歲貢生有盛德嘗以金爲鰥者置室又免人鬻婦償債秘之不自名官嘉定訓導構說研堂集諸生講貫經義終日無倦子嵩年字申侶亦歲貢官武進訓導教士有法歲饑委辦賑事按戶口必親窮氓被其實德縣多積逋學師分任催科能以無擾去之日士民送者塞途焉

楊超恒字自芬都御史汝穀孫乾隆丁巳進士授直隸藁城知縣初至縣有吏覬其年少串供頂兇出人罪者超恒立摘其繯漏升堂數語決獄卽堂上置吏於法一縣警爲神明丁外艱服闋補山東觀城知縣又丁內艱起爲廣東增城知縣屢決疑獄

民以不冤三城人尸祝之

魯晉字巨疆父允衍醇厚植德鄉里以善人稱晉中乾隆乙丑進士署福建惠安知縣爲謹廉吏惠安地濱海民開田受潮水取鹽所得課有贏餘吏持以進晉卻之舉以償民逋欠奏補松溪知縣山深民獷前令屢以訟罷官晉至推置至誠曉以大義俗爲一變湛盧山舊有鐵鼎每禱雨迎入城輒應會歲旱吏以故事請晉曰是在人事鐵鼎何知因虔誠齋禱越夕而雨鄉有六歲童子被殺者家人尋得屍詣縣言狀晉傳諭近村五里於二日內稽查戶口毋許隱漏一名果有媪自言子外出已五日卽詣媪室搜獲童子白銀繫項圈擒其子一訊而服一縣稱爲

神明後以母老改鎮江府教授著周易微言四卷養素齋古文一卷詩鈔二卷寅谷四書文一卷子琢瓊別有傳琮諸生璜歲貢生並有文名

蔣雍植字秦樹幼穎慧解四聲五歲授毛詩能擘大義里中號爲奇童乾隆辛未上南巡召試第一賜舉人授內閣中書南人召試得官自雍植始辛巳二甲第一名進士改庶吉士授職編修在館十年卒雍植故通六書雖一字之失不假借凡日月先後地理職官必窮搜旁咨求得其當然後已總裁諸公皆重倚之令總辦方略一書方略者載西事始末自車楞烏巴什阿睦爾撒納欵闕以來至擒達瓦齊耆定伊犁爲正編其先後誅大

小和卓木回部悉平經理西南屯田諸務爲續編中間歷時五年闢地二萬餘里端緒千百事實人名累譯而復具館中用車載箱致雍植家檔冊充屋莫究其首尾雍植窮晝夜之力肌分孔決條貫終始閱數歲而書成久之既上同修者皆得優叙而雍植名以卒不與同館議欲如故侍讀楊公述曾贈銜例爲之請已而未果雍植美天性撫繼母弟有恩族兄某久困京邸舉一歲俸爲贈勸之歸同年友貴州田檢討均豫遠官而貧病且革旁無顧者雍植日往視問藥餌月餘不起爲具棺槨殮告賻於同官所知並檢討之弟先一歲卒者兩柩同舉其篤親交而不易生死多此類也著有待園詩文集若干卷子如烈字述曾

國子生工書善牋奏任福建按察司司獄如燕字太占國子生歷江蘇寶山知縣廣東德慶知州改雲南姚州擢順天府西路同知左遷故城知縣所至有能聲屢擒治大盜注上考皆阻他事不得遷年五十餘卒

李宗典字鴻遠國學生考授州同知補浙江仁和場大使雍正八年杭州海潮時爲患大吏委視隄工宗典亟督築翁埠隄至李家村五里工甫畢而海嘯適至高與隄平蘇松等處州縣皆被災杭獨無害十三年委浚海塘引河河舊沙淤旋疏旋壅有老人告宗典以借溜刷沙之策從之果得清水源於蒲草窪疏浚十里而引河成乾隆元年擢柴塘通判兼理引河浙民勒十

不忘於石誦其功丁父艱改留江省補用十一年委勘無爲州江工江南岸壅高束溜趨北北岸受其衝齧日侵日割壞民田廬宗典謂當與水爭不當以地讓也令民於北岸迎衝之處載土沈舟引溜而東未踰年岸出溜移得無江患尋補徐州通判宗典謂徐界黃運二河之交加以東省湖水下注非廣浚溝渠不足以資蓄洩而備旱澇因具圖說於冊將與郡守朱某議請會舉行朱歿而宗典亦去不果後擢金山海防同知卒

勞敦杰字殿欽父世沅舉人歷四川雅安洪雅知縣課士勸農申理冤獄著有治聲敦杰中乾隆甲戌進士授山西岳陽知縣性廉謹不受吏民餽送一錢晉俗舊淳樸每歲時之吉縣老人

及婦孺多至署爭致果品等物敦杰輒與言孝友廉讓轉相勸化獄訟衰息後調介休牒未下有邑豪某者交通官吏預知狀試啗以利陽好語謝之及到縣果有狀來言事敦杰立斥其罪命收繫置之法一縣感悅敦杰嘗謂鄉里大盜繇於無藉小奸故往往小有犯法者必嚴加懲創而至於巨案株累則爲之矜卹求全縣人德之今岳陽介休俱爲立勞公祠

馬家良字中衡提督大用子乾隆丁卯舉人授河南新鄉知縣簡易不事煩苛訟者至庭陳譬設喻往往自感悅求去汰無名之征聽民自輸正課不遺胥吏下鄉曰此輩最病民凡爲宰者宜首念也歲大水沒民田廬舍家良爲具狀請賑又自支廉俸

二年助給之不足則益以衣裘簪珥凡五千餘金所活甚衆新鄉人至今思之丁外艱服闋補山東滋陽調濰縣擢貴州正安州改湖北均州以前在山東失察邪教呈吏議再起署四川會理州以母喪歸未幾卒子光輝字曉升諸生初授訓導改府經歷借補直隸滿城縣亟擢固安知縣改補河間值歲荒賑卹有法調望都某方伯家人騷擾驛站立予杖方伯稱其直再調宛平知縣以事罷官

楊樞字瞻斗拔貢生分發江蘇署上海縣亟時徐州蝗蝻大起奉檄捕治樞徒步夜率民役秉燎火焚之預掘坑坎且焚且瘞蝗害遂除擢太倉州同

李國麟字惺齋乾隆壬申進士授福建邵武知縣歷調長泰南安丁內艱服闋改直隸成安知縣擢東城兵馬司正指揮卒國麟爲縣令三十餘年老於吏事治疑獄往往端倪所隱出意表發其奸伏人以爲神

楊大觀字俯一都御史汝穀孫由貢生任江西南昌知縣擢饒州府同知署南康知府坐事謫補雲南蒙自知縣以年衰性愈直不得長官意擢昭通府通判置閒地旋引疾歿於滇大觀善雙鈎草書嘗與張雪鴻敵同居京師永光寺求書畫者車塞巷官南昌時吳中丞紹詩見其書曰摹成者面試之驚喜令書滕王閣序字大如椀張於閣上三日士民走觀至閣不能容乃檄



去其書先書匡廓初若不可識鈎成極工能臨帖大取古柏行小取天馬賦粘於壁書成合壁上無少參差者蓋絕藝云  
楊全蘊字月舫乾隆辛卯進士授福建泰寧知縣泰寧居萬山中地僻少文舊登科目者甚罕全蘊捐俸修葺書院增置生徒膏火延致明師教焉暇日親詣院進諸生聚講一堂後諸生多掇科去有寶蓋巖寺僧者淫掠人子女交通官府爲姦利全蘊捕得盡榜其不法狀立斃杖下一縣稱快縣城外棲鳳凰山有物爲崇能攝致小兒食人牲畜全蘊檄山神毆之助以火器怪遂絕在縣十餘年以老乞休羈公事不得歸縣人日醵錢市薪米擔送邸舍數年卒又請於大吏爲位配宋三賢祠祀焉著月

### 舫詩文鈔若干卷

江濬源字岷雨乾隆戊戌進士授考功司主事晉員外郎又晉稽勳司郎中兼考功司事在考功十餘年貨賂不敢及門吏不敢爲姦弊己酉科爲陝西正考官取士稱當出爲雲南臨安知府臨安邊遠民有未知義者一以道理諭之訟者至呼就案與言至不可教乃威以法有兄弟以財訟者爲言骨肉之誼其辭甚痛言未終訟者泣涕求去訟益稀臨安所屬夷氓土司十寨十五舊土官謁知府其儀知府坐堂上如神明土官階下跪拜遑迫不聞一言而出濬源獨接以和易予之坐參問夷氓便苦具悉其情又禁胥吏毋索土官一錢土官感恩奉命愈謹而

事大治歲行視郡縣水道建水瀘江象冲塌冲三河及營峨貌  
練江多水災捍備法尤悉民獲溉田利者萬家勸修橋梁至五  
六十餘所多爲文紀之修葺書院捐置膏火千金日會諸生講  
學課文誘進其行誼復義學五十九所先是紳士以義學讀書  
人少欲裁之並入縣書院濬源不可謂義學爲教化鄉愚而設  
若裁之是縣城有學而四鄉無學矣識者謂其知大體嘉慶二  
年興義苗叛延至廣西州之五槽隔阿迷僅百餘里土司爭威  
奮願募練千數百人備郡城自効大吏遽調之他往濬源復募  
鄉勇六百防禦民得無恐明年地震石屏尤重男婦斃者四千  
餘人極捐廉煮粥蓋草棚安集之爲請於朝以賑後攝迤南道

篆猱黑亂總督檄領土練千餘由普洱威遠會勦作邊防論四  
篇言守邊利病尤具在臨安時南掌人擁衆至納樓土司界聲  
言猛蚌係其國故地請畫還濬源檄以我朝版圖有定制何得  
妄冀干越南掌人畏服竄去澧社江六蓬渡有螞蝗之孽時覆  
人舟濬源爲文祭神其夜大風雷鳴若有物隕墮崇竟滅人以  
配昌黎之驅鱷云年七十引疾歸後四年卒於家祀鄉賢著有  
介亭文內外集十二卷筆記十卷居暇邇言二卷于役迤南記  
二卷北上偶錄三卷獨秀山房四書文二卷詩二卷

黃崇蘭字學存家貧從師讀書同舍生助以舉爨夜乏膏火默  
坐聽他生誦能盡記其文乾隆辛卯舉人任蒙城訓導居恒以

矩矱自檢終日端坐不妄言笑教學徒敦尚行實傳經義切劘  
爲文章士風丕變興修學舍並建立莊子祠丁母艱改涇縣教  
諭誘誨不倦一如在蒙城時所得修俸買田數十畝盡以付諸  
弟嘗勸戒族人曰處親戚鄉里莫善於忍氣喫虧而已有同里  
某病將死召家人至前批其頰曰汝教我欺謾黃君黃君長者  
是使我茹憾地下也著網庭詩文鈔四卷又貢舉考略四卷採  
輯詳核後凡記有明及國朝科目故實者因之子鼎字漢年副  
貢生任太和教諭廉儁有文名

劉炳然字藜閣乾隆戊申恩科舉人歷任浙江太平泰順諸暨  
新昌山陰常山鄞縣嵊縣縉雲秀水等縣知縣嘉慶辛酉丁卯

浙江鄉試同考官所得多知名之士官浙二十餘年懋著循聲  
去時士民輒攀轅祖餞繪圖賦詩傳爲盛事著有麓語小草煮  
賑紀略

蔣振萬字虎臣由國學生補四庫全書館謄錄議叙縣丞分發  
湖北嘉慶元年署長陽知縣時教匪蔓及縣境縣兵少所募鄉  
勇散守村堡倉卒賊至殊不知振萬懷印夜縋城出短衣麻鞋  
走各村呼鄉兵速禦賊或疑其妄出縣印示之信因爭出擊賊  
敗卻之又隨大兵敗賊於宜都縣之聶家河又焚燬王母洞賊  
寨斃賊數十人又渡河殺賊一百餘人又攻奪陳家湖及灌灣  
腦西路各處賊巢事聞硃批可嘉之至賜藍翎並六品頂帶尋

卒

丁拱辰字靜齋由國學生補四庫全書館謄錄議叙縣丞分發湖北補公安縣丞署歸州判嘉慶元年募鄉兵駐新灘禦賊獲賊三十餘人並賑集難民記大功三次調補京山丁母艱服闋改發山東補惠民縣丞調掖縣丞道二年以年老告歸卒拱辰清苦介特未嘗以非分干人始家貧自奔走衣食奉母田宅悉讓兩弟妻子寄食外家及得一官母老不獲將獨封還廉俸以養母歿自以缺於迎侍爲憾孤身旅宦十餘年禁子孫不得往省歸里日一衛自隨家無儋石之積衆贊其廉

江灃字蓮溪由武英殿供事選廣西臨桂縣六塘巡檢調宜山縣白土司白土在萬山中猺獠所巢例禁漢民竄處乾隆間有廣東潮惠客民潛入盤踞占欺官弗之禁後遂公引黨類大肆剽奪猺甚苦之灃爲條具其狀請發兵七百餘人驅令出境夷地獲安有楊姓者家饒於財偶莫氏婦採樵墮崖死莫之族人某素怨楊甚之誣楊逼姦致死遂論楊大辟灃知其冤以白縣不聽爲白於大吏得昭雪擢都康土州吏日再調鬱林州吏日懷遠縣主簿以勤幹稱

方承孟字守陬有膽智又有口辨由方略館議敘揀發雲南補河西縣典史署曲江司巡檢拉里黑土夷恃阻遠不輸租賦吏至輒竄取反縛以巨木沈之江縣府不能捕承孟夜率鄉兵深

入百里捕獲其酋命衆疾載馳去已數騎斷後果追者數百人至承孟叱曰酋已去不可復得也敢動者卽大兵到撲滅汝矣衆驚阻相顧逡巡而散承孟敏於聽斷時布政使嘗以承孟署經歷承孟請假便宜行事司胥吏聽經歷指磨簿記傳呼唯命民有不便爭詣司言狀案無留滯縣及丞尉訟牘一空尋以資授縣丞歷署富官村縣丞廣西州五槽州判彌渡通判皆有治聲在富官村請裁雜稅在五槽有楊家寨土夷嘯聚千餘承孟復深獲渠黨魁數人餘諭以恩威悉縱之夷衆感服總督伯公麟以卓異薦旋卒

李豐特字西池縣丞借補甘肅階州吏目署紅水縣丞歲大旱

饑民嗷嗷迫不及賑豐特署無升斗輒典衣借貸預散給貧戶錢多所全活大吏嘉其能委署巴燕戎格通判時昂拉等族番賊搶奪牲畜傷斃土民豐特前往宣諭番衆畏懼獻出番賊二十餘人事聞奉旨授眞歷署西寧府及安西州事卒

濮昌崙以供事議敘任直隸景州龍華鎮巡檢性耐貧薄不受請囑妄扑責一人客至不能爲具餼饌丁父艱服闋歸取文書布衣麻鞋肩襍被徒步往返數千里前後在任幾二十載龍華父老以爲自兒時所見無此官矣

鄭賢以供事議敘任雲南楚雄縣典史著勤能楚雄人思之至今猶以爲良典史

任忠庾字雨樵乾隆癸卯舉人任廣西思恩知縣性廉謹卒之日貧無以殮同官爲經紀其喪子客江西不能歸藉遊幕以餬口

路一湛字立崖國子生任廣東連州朱岡司巡檢能爲廉於民無擾以母老歸養去百姓爭擁留之

以上道光志  
江爾維分纂

蕭應植字立齋工行楷書由拔貢生廣東揭陽知縣以捕盜功擢瓊州知府愷惻廉明周卹民隱勸農桑輕徭賦省刑訟釐奸弊尤加意士類建瓊臺書院勤於考課人才多所造就治郡十年民敬如神明親若父母

載瓊州府志  
名宦傳仕至湖北安襄鄖道

蔣如鯤字星渠廩膳生力學敦行初署建德教諭盡心訓士士

心歸之適縣試知縣以事袒差誤責童士衆議沸騰約不應試如鯤曉以大義諸童乃帖然歷署舒城鳳陽教諭壽州學正廬州府學教授授鳳陽府學教授時廬鳳道周天爵風裁嚴厲訪知其賢遂與訂交深相契結令二子受業其門年且八十解職歸里猶神清氣健日從事於詩酒弟雲燕歷任江蘇寶山縣知縣雲南姚州知州廣東德慶州知州直隸易州知州擢順天西路刑錢府兼轄西路營官兵所至多異政屢擒治大盜爲政清勤蕭然囊橐嘗云積金與子孫子孫必受其累時論歎美之從姪宗墉字曉山歷任涿州霸州州同三角定通判北岸同知加知府銜署永定河道工書畫喜吟咏判涿時築三益臺必知名

之士勝己者始與登臨否則百尺獨臥而已

宣眉字介圃幼奉繼母極得其歡心事庶母亦謹爲諸生試輒魁其曹課士以質行經學爲先得館穀皆分潤貧乏所受先世田悉以分給諸弟營葬兩世先塋皆獨任之嘉慶戊午舉於鄉授天長教諭以寬容爲化士習文風爲之一振丁亥水災奉檄辦賑務令無一人冒濫武生周某核應減乃咆哮而入諸生惡其無禮請懲責眉溫諭之周感愧伏罪文生蕭某因人以訟牽其父隨往探縣訊鞠吏役以賂故喧阻之縣怒詳褫衣頂眉爲請諸督學事得昭雪知縣某父死匿二日不發喪丞偵知約眉摘舉眉以責令而勸丞釋憾訓導某學行不爲諸生所悅不平

於眉眉私諭諸生毋分軒輊某竊知之始敬服焉後告歸士民有攀轅流涕者子文塾歲貢生文淵道光甲午舉人授含山縣訓導未之官卒諸孫林立濔昭焯曙皆以英年蜚聲藝苑而早夭折士林惜之

王用賓字禮之六歲而孤奉母教維謹道光丙戌進士選授江蘇沐陽知縣調儀徵濱臨長江沙漫洲一帶萑苻之藪擾害商旅用賓親往訪拏按律懲辦江面肅然先是淮南引鹽運至儀徵改捆民食其利督鹽使者欲就場捆焉儀民大譁奸人藉之欲爲變用賓力請於大府如其故始相帖然又稟裁浮費以紓商而裕課辛卯江水大漲漂沒田廬用賓捐廉以倡駕舟設棚

爲粥以賑之水落令速歸井里然後查明撫卹大書戶口於屋壁毫髮無所冒濫及春籌給牛種以資耕作凡獄訟按期親坐堂上閱其呈詞立傳訊斷無稍稽留情涉牽連者置不問儀民愛之如父母畏之如神明焉以督撫保擢海州權知江寧府事皆有政聲授福建漳州府知府甫兩月丁母憂服闋補江西吉安知府年餘卒於官

王璪字魯園高祖以下五世同居承父容忍涵養之訓終身雍睦無間言母程病瘍侍醫藥不違頃刻幼穎異甫十齡遊寺院遍抹壁題詩師喜云皆當父大怒曰是浮薄不可長也遂刻意謹飭不敢雌黃人物爲文有根柢年十七學使汪廷珍首拔之

嘉慶戊申中順天鄉試經魁復出廷珍之門道光壬辰成進士用戶部主事歷官至山西司郎中所處皆腴地時屢更制吏因緣爲姦欺璪齋心釐剔處職二十餘年無敢干以私亦無議其刻者咸豐四年以京察一等授湖南寶慶府知府權衡州府事禦寇平姦常先事爲之防郴桂賊旣去餘黨懼罪璪剴切宣示予以自新後去任月餘兵勇有謀亂者獲數十人鞠之衡西無一從者在衡以養民教民爲職成就士子甚衆時值亂當事者主嚴覈璪務持寬平不合乞去屬令多以平姦功超遷大府璪獨不可曰以民命博簡擢非所願也旣辭職歷主汴省周南宛南書院困不能作歸計節相曾國藩延歸主講敬敷書院年且



八十矣越二年而卒生平力學務本以是律已亦以是教人人輒以道學目之然實未嘗矜言講學也尤存心愛物居京在家凡利賴邑人者爲之必力非此絕不履公門總纂邑乘於關繫倫紀者尤審慎巡撫陶澍郡守劉韻珂咸尊禮之著有家訓息廬遺稿子希杰優貢生官懷遠訓導在任十載以質行爲化遇士有志學而貧甚者輒分脩金資之咸豐元年懷遠饑奉檄襄賑務力除積弊逾年髮逆陷省城饑民蠶起劫奪縣官以爲捻將捕治之希杰謂此飢民耳宜急勸富戶捐資團練飢民得食化寇爲兵境賴以安後髮逆由金陵渡江自滁州犯鳳陽希杰與文生金照普姚文台武生常元確倉卒起義往援聞城已陷

遂擇隘防守與賊夾渦而軍賊作筏欲渡擊之淹斃百餘人又槍中賊目一名始稍引退時縣令不知去向義勇聞而氣懾散者甚衆惟存五百餘人率以退守賊已西去忽蒙城捻頭大錘手賊冒而來會雨甚遂與元確等赤足督勇巷戰自辰及酉捻始敗退計斃匪三百餘人奪衣物器械無算次日欽差周天爵帶兵至知希杰賢勞欲委以縣事希杰以不合例辭時後令以辦匪邀功冤殺平民情憤怒潛通鳳臺捻頭張茂遂致大亂實任縣令朱鎮來視事希杰爲言宜安撫居民與擊外匪不然必不可支鎮深然之民果倒戈擊匪後張茂復來犯境報倒戈之役希杰帶勇擊退之自此不敢復犯邑人每以武教官稱之

遷壽州學正將去懷遠士民焚香餞送自縣至於淮河兩岸相延二十餘里在壽不及一載丁母憂解任奔喪河南後以父年高不復仕遂卒於汴支蟠優貢生成豐乙卯順天鄉試舉人官高陽縣知縣有政蹟支釧支鈔皆縣學生以文行重鄉里俱早卒

丁燮字友堂嘉慶癸酉拔貢充武英殿校錄授蕭縣教諭倡捐置地七十頃興復龍城書院以培寒俊文風一振奉委勘水災密市衣餅視凍餒者給之全活甚衆緣岱山澗溝二河常漫溢爲患諭紳董照業食佃工例相地勢豎卒估墩掘疏閱兩月工竣迄今民食其利有孝子鄭立本者父戍西城負骨歸葬爲詳

上司給匾額以獎異之忌之者以不實訟於官而烏魯木齊都統關文已先適至矣內有萬里尋親孝心可憫等語訟者慚沮先是立本抵戍所父死已六年幼聞母言父左手有橫紋小指缺兩節及啟視骨肉枯朽獨左手如生土人詫其事聞於官都統長準給長車搬靈回籍立本不及待故關文由驛遞先立本三日到立本素貧時加伙助爲完娶教之讀書能詩燮致仕時其詩有願師多買間舟楫好載蕭人去後思之句燮素勇於義捐田四十畝倡建家塾以教族中子弟於書史多所手訂著有禹貢輯解四卷思貽堂史鈔二十卷思貽堂稿二卷

陳世鎔字大治一字雪樓聰穎秀發九歲能屬文父令爲雁字

詩應聲云不作人間字長留天上文十四歲賦迎江寺塔云江  
心一片影終古不隨流少長淹貫經史睥睨百家強識不忘爲  
人縱橫馳騁不可羈勒嘉慶癸酉拔貢生丙子舉人就挑授婺  
源教諭旋復應禮部試道光乙未成進士以知縣分發甘肅歷  
署隴西知縣岷州知州補涼州府古浪知縣幕無賓朋一切皆  
身任之以簡敏爲治尤加意於課士振拔寒微童試所得士如  
伏羌王權武威李銘漢撫愛過己子後皆取乙科以文行重鄉  
里世鎔所至以文名傾等輩遇事侃侃言談無少顧忌時或於  
上司前脫冠服莫有以爲非者尤雄於詩林文忠則徐以夷務  
遣戍道出古浪造世鎔舍一宿見所作登華山諸詩手自鈔錄

達旦謂人曰古人復起奚以過之讀之令我神往道光季年遷  
擢同知遽引疾歸營所居室命曰求志居每晨起兀坐讀周易  
或夜臥思有所得輒披衣起坐挑燈就草庚戌正月朔旦爲著  
作繇辭書於壁曰天傾口動兵起西方歲則大稔民悅无疆以  
示人莫有知其解者會成皇帝上賓明年改元咸豐髮逆起廣  
西其言一二應咸豐壬子布政使李本仁工詩聞其名以詩來  
謁相見大懽世鎔謂安徽將有兵劫本仁以歲星方在斗爲安  
徽分野當蒙福不聽世鎔出遂挈其眷屬歸天柱癸丑正月省  
垣陷踰年賊蹤徧巖谷世鎔遠去轉徙於陝西河南山東浙江  
湖南湖北無定所舟車所至必以楮硯自隨所爲經說數十卷

多成於旅邸省垣既復跋涉來歸年逾八十猶日事鉛槧言論  
風采如平時卒年八十有七鎔好蓄書巡撫陶澍愛其才收置  
門下嘗厚給資縱其置書以故所得獨精時承平久世鎔知天  
下將有故乃購求薄田於霍嶽天柱之巔築室數楹納藏書其  
中後卒爲縣官某胠篋以去聞者惜之平生喜治堪輿家言既  
卜葬其先又自營壽藏爲其四子置葬地各一區在甘肅時所  
治縣率人文衰歇不利試世鎔執羅經循視爲改移其規制科  
名頓利其自所營諸地鑒賞特殊術者莫窺其秘妙云所著有  
周易廓二十四卷書說四卷詩說六卷禮說三卷春秋說四卷  
學庸侯三卷論語侯三卷孟子侯一卷易學支流二卷求志居

詩集二十卷文集十六卷求志居唐詩選八十二卷皖江三家  
詩鈔四卷求志居時文二卷

潘政舉字樹人穎慧力學經史餘閒究心吏治道光初知縣王  
毓芳聘修縣志旋領鄉薦考取咸安宮官學教習成進士卽用  
知縣籤掣陝西適有疑案久不決政舉至一訊卽承大吏服其  
才凡有大獄咸相引重歷署佛坪同知臨潼咸寧知縣補延川  
知縣調大荔升鄜州直隸州權知同州府事所在皆有惠政尤  
以教育人材培養士氣爲務任佛坪時倡修學宮籌增諸生膏  
火咸寧附治會垣爲上司喉舌寅僚皆倚重之時有川民以左  
道惑衆者政舉稟請嚴辦剴切諭以利害民感悟未嘗拘繫一

人而禍遂寢大荔爲同郡首邑漢回錯處刀匪訟棍互相盤牙號稱難治政舉任事數月皆就安謐其任牧守也一以清慎勤爲屬吏表率儉衣食而致隆禮祭嘗謂福祿有定分身居民上當深悉民隱敢濫取以自奉與爲政寬嚴相濟未嘗黷法爲出入每閱案牘鈐私印文曰天不可欺喜振拔善類卹州學正劉觀光值計典被舉卓異政舉之力也年五十有八歿於官士民奔奠號泣靈輿旋里道經咸寧臨潼鄉民共設香案叩送者爲之塞道

丁學易字以堂年十三遍誦六經學使賈允升激賞之拔入泮甫成童食廩餼道光壬辰鄉舉甲辰大挑一等以知縣簽掣直隸歷署西東明補寧晉咸豐四年調清苑兼理河務鹽捕同知所在以廉能見稱五年擢冀州直隸州軍功擢知府歷署正定河間府知府加道銜以目病致仕學易爲人厚重有體政聲卓著所去見思在寧晉時恭辦顯皇帝恭謁東陵御道在冀州時惠皇后梓宮入西陵顯皇帝梓宮自熱河回京地盤供應皆祇辦裕如咸佩其才當咸豐時安慶久陷師友姻黨奔學易者如歸學易慰安之未嘗以囊空略有難色學易歿於直隸鄉人雖未與識面咸悼念之

劉有筠字竹儕厚重寡言笑取與一介不苟母疾侍湯藥衣不解帶者月餘居喪擗踊哀動行人中順天鄉試舉人挑選知縣

復挑一等皆不就改授靈璧教諭縣爲皖邊圍科第寥寥有筠至月課諸生口講指畫士子經其成就掇巍科者踵相接也邑荐饑前後奉檄與縣官商賑務躬親詣勘痛懲胥吏黠紳侵漁灾黎頌之咸豐癸丑粵逆之亂捻匪乘機四起縣東連淮泗西界穎壽爲賊衝要贊令起團練晝夜巡視時嚴寒率民夫修濬城隍皆踴躍用命數月告竣縣人爲立挑河培城紀功碑

葛芳字念農性敏力學嘉慶間隨勦逆匪趙金龍以功擢湘陰典史承審匪案悉心體察分辨申理多所全安喜培植寒俊邑有孝廉某無計借資芳分俸與之遂成進士弟高狷字子中諸生納粟以典史分發廣東補英德上司察其能以香山要缺地

接海隅商民雲集盜賊所出沒特檢題補境內安謐同治初髮逆逼境身率練勇晝夜巡視城賴以安事平特保六品頂翎舉卓異卒於官民哀思之弟高鷺見文苑

楊秉璋字禮南汝穀玄孫咸豐六年進士入翰林授編修累遷侍讀學士署國子監祭酒授四川提督學政先是四川攷試喜頂名冒替院署承差通同爲姦有一童倩數人進考者名曰一柯蒞秉璋廉得其情痛加懲創其風寢息京都舊有懷寧會館自王瓌任京職二十餘年創立規條修葺齊整至者如歸秉璋復式廓之人有同鄉義塚爲增置產業俾歲時得資祭掃焉

同治志馬  
徵慶分纂

丁枝字汝敬早孤苦學砥礪名節以歲貢司訓甯波宣教有聲未終考績而歿甯士紳舉祀名宦祠

吳暉珥字月峯天資穎悟有志經世之學道光戊子舉於鄉以大挑知縣分發山西親老改鄂歷署鄖陽棗陽襄陽縣篆以母憂去職咸豐改元大吏以前在鄖陽襄陽任內迭獲隣境盜犯保以知州升用服闋回原省署長治調徐溝旋補榆社時髮捻竄潞澤以暉珥防堵功奉旨交部從優議叙兩次分校晉闈所得皆知名士後署壺關補汾陽皆有政聲大計案內保列卓異同治癸亥以錢糧三載全完經晉撫保以同知直隸州用大學士祁寯藻保列循吏晉撫沈桂芬奏請大用大學士羅惇衍奏

請遷擢旋題升潞安府同知並以汾陽團防功保加運同銜未幾積勞成疾卒於任所暉珥治汾最久下車伊始首修西河書院每月課士親自校閱捐廉俸以資獎勵士風丕振歲薦饑饉請大府借倉穀助賑活饑民無算汾地多高崗桔槔不利暉珥勸民量畝鑿井以資灌溉其山田有泉可蓄者督令築堰修堤預防亢旱或有層崖危坂無法鑿井之地則令爲區田其法與種瓜相類量地區種數畝可贍數口之家遇旱則提甕澆灌收成預操左券汾之婦女素不知習女紅暉珥購紡車數十輛教之紡績並令宅畔樹桑以備養蠶之用維時捻匪猖獗回教梗化南道阻塞羽檄改道於汾乃多購良馬以備徵調京旅出發

將由汾之永寧抵峽而不知郡城之西崎嶇萬狀暉垣面謁晉撫奉准改道而汾境獲安吉林馬隊調寧夏值麥秋恐遭蹂躪乃廣設館舍厚給芻糧軍吏感其義秋毫不敢犯汾邑部民咸呼之曰吳青天任長治時捻匪迫城暉垣登陴死守用疑計遣壯士數百人循城環走更番點名以示之備捻懼而遁有僕人余祥者匪至之日願與偕死暉垣義之在壺每遇旱齋戒沐浴爲文禱神深自引咎而甘霖立沛蓋至誠所感云

丁曰健原名葆垣字述安父堂宿遷知縣曰健寄籍宛平補順天府學生員道光乙未舉順天鄉試癸卯以知縣揀發閩省歷攝建陽鳳山嘉義等縣事擢同知直隸州加知府銜權淡水同

知捐升道員復以勞拜花翎之賜在鹿港治械鬪事不姑息通州徐清惠方任臺道倚曰健如左右手既清惠擢任去吏治營規日弛曰健亦旋省奉委分防延平以次復汀州郡縣屢著戰功權督糧道已而臺變作會匪戴萬生等陷彰化斗六鎮道副將同殉嘉義賊又起將兵者屢敗鳳山府城均震動曰健方欲移疾未得請草平臺六策備緩急時清惠官巡撫博稽衆論僉謂非曰健不足平賊乃強起之奏委督辦全臺軍務得旨補授臺灣道曰健卽日啓行力疾誓師由五虎門徑渡淡水滬尾口別遣參將田如松以銳卒四百先渡既登岸召集淡水舊部閩粵勇士帥以進先勦蕉坑新起賊會師入斗六擒萬生克加投



賊巢復彰化最後以全師入內山勦滅洪糧巨股臺事大定特旨賞二品頂戴加布政使銜同治五年乞休歸金陵卜居安園與邦之大夫士結社觴詠相將娛老有治臺必告錄行世言臺地利害者輒有取焉

阮棻字贊山邑廩生弱冠登道光丙午賢書咸豐初以知縣揀發山西歷官鳳臺永濟芮城定襄等縣以經術飾吏治爲政持大體時豫捻竄晉棻適宰鳳臺阻太行築碗子城扼險以禦澤郡賴以安他如捐廉修書院培養士類勸課農桑善政不可枚舉擢霍山代州直隸州寧武府知府卒於官清季晉人請於朝祀名宦

彭爵麒字豫卿父嘉文以子官贈四品封爵麒幼讀書慷慨有大志道光己酉舉人咸豐間福濟撫皖奇其才羅諸幕征繕擘畫多所贊助擢直隸懷柔令旋遷大城以母憂去職服闋會魯濰鹽匪亂大吏以爵麒能應變令佐軍爵麒親自跨馬先士卒鏖戰斬馘無算賊平授東安令賞戴花翎調權遷安縣事加運同銜晉景州薊州牧所在有政聲尤慎刑每錄囚必輟食思過嘗惻然曰誰非良民而盜我之罪也其慈厚類如此時亂初定士流徙多廢學輒日諄諄與多士講聖賢精意懷柔遷安故無書院爵麒皆爲創建以是得士稱盛一時喜著書經兵燹散佚今第存吟仙館詩草性至孝親疾侍湯藥輒兼旬不交睫長

女詠春卽墜景州塔殉母者也至今邦人士咸稱女孝有由云  
弟城字堯卿與伯兄紱俱以申韓學爲疆吏重咸同軍興皖撫  
福濟責以轉運事間與英果敏拒賊於蘆潁六泗間以勞授貴  
州正安知州正安苗蠻雜處地素難治城能懾服且多政聲旋  
遷涓潭繼任者爲楊牧楊年少躁於行民易之越二月民變漏  
二鼓聚衆數百闖入署刃楊首懸譙門事聞大吏檄城回任事  
遂寢殲亂魁數人餘悉散復爲良民如初士民頌功勒石於州  
之雷公廟後兩任涓潭均以寬惠稱擢知府赴引過皖省墓病  
卒

葉坤厚字湘筠六歲能詩應童子試必冠其曹道光丁酉以拔  
貢選知縣需次河南會河決祥符水及省垣居民倉猝登埤危  
甚坤厚總司宣防局督夫役晝夜搶護設法賑撫危城獲安補  
臨潁未赴官攝許州及彰德府南陽爲捻匪窟宅喬建德以首  
猾在逃坤厚懸重賞弋獲於山東郡內大治丁憂去職服闋赴  
補洵擢道員賜孔雀翎加布政使銜總軍需籌防捐輸等局綜  
核鉅細躬任勞怨嘗權彰衛懷暨南汝光道在彰衛懷時興復  
河朔書院倡捐八千餘金延名師課諸生所造就多知名士在  
南汝光時歲大稜角子山素多伏莽將煽惑爲害坤厚急捐賑  
撫爲弭其患方其以憂歸也值粵寇陷皖坤厚走臨淮乞援於  
督師袁端愍端愍遣臧紆青統師援桐功不就復命赴滁和剿

賊既克滌勸紳輸餉十餘萬贍軍服閱將入都豫撫英桂留襄  
戎事剿捻逆於歸德疊以捷聞於朝入覲垂詢周至旋豫定南  
陽王黨之亂搜獲夥匪數百人督師毛昶熙駐歸德尤倚重之  
機務多所贊畫坤厚澹於榮利視世俗干祿冒進者夷然不屑  
故終其身未補官惟時遊情文藝作詩古文詞發摯已意卒年  
八十有八著有江上小蓬萊詩二十卷詩餘二卷石林詩話二  
十卷守城日記古文雜著數十卷子伯英開府關中迎養不赴  
乃於歲時致修隨訊晨昏使者絡繹在道嘗構園亭於近郊以  
暇日扶杖遊觀見者目爲神仙中人云

江潮字海門父爾維子六人潮次居四兄奎紀佩湘弟慶萊錯  
各有傳少孤依世父景紱於梁埭以候選縣丞董安慶撫郵局  
事李傅相撫蘇檄調赴營委辦籌餉及諸要差旋受江督馬端  
愍委提調松滬總局一持以廉靜到局卽裁舊所取征銀息歸  
公以爲局員倡遇屬吏舞弊者痛懲之積功保升令丞留江蘇  
擢郡守戴孔雀翎秉性孤介絕意進取惟於公暇取先世詩文  
遺集燬版於兵燹者次第重刊手自校閱間以餘資收藏圖書  
後有仇公亢直者稽查出入簿無毫髮私始折服次子祖馨號  
穀孫廩生有文名早卒

葉伯英字孟侯號冠卿以附貢官戶部廣東司主事從欽使毛  
昶熙平豫捻爲畫堅壁清野策汝光間得免殘破會昶熙征汝

南遣攻張岡老巢匝月陳逆大潰成擒張岡亦平奏以知府留  
甘肅時郜逆雲清尙踞商邱捻首張洛刑等倚之抗拒官軍不  
得東下師久無功僧邱方在山東伯英請齎書幣勞軍因得馬  
隊截勦援賊躬率步隊乘之百餘日拔其巢乘熙凱旋飭民團  
繳軍械毀寨堡伯英以時未靖持不可卒安謐無他患戊辰引  
見以道員待次直隸旋賞花翎晉按察使銜任練餉局營務處  
條陳新章及餉運宿弊直督曾文正皆見嘉納明年文正調任  
兩江盛稱其賢於新督李鴻章尤倚任之壬申署清河河道經營  
河務者凡十年先周歷東西兩淀復由兩淀溯流而上得清河  
全局因建議請堵築雄縣趙村決口以障橫流闌入西淀開蘆

僧舊減河以分清河水勢濬趙王河以通西淀而去淤濬滹龍  
河下口以暢河流入淀之路築滋河南堤滹龍河南北兩堤禦  
滹沱橫水不使闌入滹龍鴻章嘉其議爲籌帑金十萬付之癸  
丑正月親駐工先革按土方計丁畝之政屬吏弁役所需一取  
給於伯英如所籌畫濬治於是大清河堤三百餘里次第復故  
觀凡附近廢堤淤河無不修濬河道底定奏聞加布政使銜民  
爲建生祠立豐碑三以銘嘉績每巡河自春徂冬風雨寒暑罔  
間後遂著爲令於趙北口建行廳焉辛巳欽使左文襄勘畿輔  
水利見各工堅完大歎服以才長心細入告後凡四署直隸臬  
篆案無留牘旋授陝西按察使司晉布政使尋晉巡撫蒞任止

州邑鎮將供張簡閱軍政鉅典也於陝久不行爲請於朝毅然行之又上興利除弊八事曰育才墾荒興水利廣蠶桑編保甲禁罌粟義倉宜慎出入釐局宜專責成皆得優詔俞允生平於人才尤措意甫下車卽蒞關中書院起廢舍置書千數百種又於宏道味經兩書院各購若干冊戊子科監臨陝闈體恤士子尤至以在河工患濕症觸勞復發出闈遂不起年六十有四遺疏入上軫悼飾終如典禮著有畿輔治河記畿輔陳臬記關中旬宣公牘關中奏稿及耕經堂詩文集計八十餘卷

王岡字森林豪俠不羈有吏治才以例選任甘肅岷州吏曰岷俗佞佛歲有城隍會男女雜沓時釀巨禍力禁之旋以協勦川

湖陝甘教匪及西寧野番功署皋蘭縣值回逆圍城幾不守岡單騎夜出赴省請援三戰皆捷得解事聞陞洮陽撫番府同知方請兵時路經弱水河策馬徑渡居民詫曰此河一羽必沈固無敢渡者公之得渡天佑之也在任決疑獄如神有命案久不決百計尋證驗不得一夕夢神告曰明日當有犬獄異之詰旦果一黑犬呶於堂尾以役至鄉僻空舍處血污地時雪深盈尺犬離屋百步據地號掘之屍見役復如犬所之酒肆中有酣飲者犬齧其髮拘而鞠之遂獲其兇人咸以爲精誠所格岡仕最久每去任居民攀轅泣送百餘里不忍離生平守其祖補田遺訓年七十告歸竟囊無一錢云

王郅字佩秋祖俊父延慶郅性和厚少失恃與兄郊祚鄰極友愛秉質聰穎出輒驚長老年十六入邑庠與友人開詩酒社植花種竹或遨遊爲樂帖括學非所屑也然每一拈筆無不胎息近古試輒冠其曹癸酉膺優選入都以中書供職內閣旋署侍讀戊子中順天鄉試出任四川城口廳同知攝榮縣旋授理番撫夷府聽訟無疾言遽色嘗勦立學堂躬親講畫大吏以勤政愛民旌之故事土官承襲歲納數百金郅悉以佐生徒膏獎癸卯分校鄉闈稱得士會巨魁陳匪爲變督捕獲之全蜀賴以安著有詩草俊逸清新惜多散佚

姜光耀字子輝同治二年選授廣東吳川縣知縣在任四年凡要政無不舉詳吳川邑志六年調署茂名亦如在吳川時邑中道路津梁及善局皆捐俸伙助督興之故吳茂兩邑民戴德歌頌至輯成巨帙云

王葆昌字純甫性豪爽有幹略於時論不當意輒謾罵同列目爲狂癩上官愛其才每優容之同治五年知豐縣事豐自成豐初困於水葆昌爲出千金倡興水利循泡河故道自附郭里許施功曲折五十餘里入山東魚臺縣界直達昭陽湖半載工竣名其溝曰利民岸上禾黍競秀變沮洳爲膏原民至今利賴之事詳江蘇豐縣志

姜篋字筱珊父慶成見篤行篋生有異姿由監生得河南州判

以軍功擢知縣累官至開歸陳許道賞花翎晉按察使銜加二品頂戴始爲縣令有惠政所至勒石頌德民弗忍其去至攀轅脫靴進酒爲別箠固能吏然尤善治兵鄢陵實莊會藪藪聚衆滋擾箠至以計擒其渠數人餘潰散境賴以安任邾值土匪起親率民兵登陴旦夕巡守賊攻城多殺傷令分兵爲二一親冒矢石率以搏戰一策其必南逸還扼之果如計奏捷是時皖捻蔓延所過郡縣飄忽如風雨而邾以彈丸地卒無警叙功調河內并以同知直隸州在任候升亡何丁外艱適僧王奉詔勦捻匪耳箠名羅諸幕大軍數告捷多所贊助王以是益奇之表請守歸德以道員用歸德固孔道且值多事轉輸不暇給箠素具

成算軍事得以無乏於是改守開封以母喪去職闕權開歸陳許道尋請補先是滎澤河決豫撫李屬以修築事箠悉屏騶從或駕小舸或單騎往來巡督雖大風雪不少弛患卒免會大旱人相食箠首以賑救請大吏愕然力爭至泣下卒不許後大吏卽以是得罪去上旋簡袁文誠爲賑務大臣并命豫加派會辦員文誠素知箠勤恪以箠奏請而豫大吏亦服箠先見卽以箠充會辦員每事必躬親廩粟不虛糜而實惠在民民活無算逾年豫又饑復請於城外闢地爲舍蠲廉備衣食給寒餓者民困旣蘇而箠竟以積勞致疾卒年六十天子聞震悼詔贈太僕寺卿附祀袁忠愍祠政續宣付國史館立傳并賜祭葬銀兩遣員

致祭異數也。筮樸面納口與人言，藹然惟恐傷。然在官有所執，雖貴勢必力爭，務期於當而後已。性慈厚，苟戚族有貧乏，必盡力濟其家。篤孝友，雖服官侍其父，必坐云。則坐肅然，不敢越嘗。曷諸弟曰：我媿不出身儒林，弟宜共勉之。

丁仁澤字潤之，號象湖，咸豐辛酉優貢。同治甲子科舉人，李鴻章巡撫江蘇禮聘入幕，隨李軍分授浙皖閩等省積功保舉知縣。到蘇候補時，沈葆楨督兩江保奏以直隸州知州用。未幾委署清河縣事，抵任甫一月，清理前任積案凡一千餘起，規復崇實書院，獎勸士類，不遺餘力。罷徭役，清積賦，年餘境無盜賊。禾不旱蝗，調任蕭縣。先是仁澤祖燮任蕭縣教諭，捐貲倡募建龍

城書院，又念蕭地平衍，患澇，建議疏治龍山岱山兩河，以事宜洩，終以力薄不舉。仁澤至，首先致力於此，手胼足胝，凡十閱月，旋以辦理劉姓命案忤上官意，調邳州。又調銅山，龍岱河工因之中止，然蕭民食惠已無窮矣。仁澤服官十餘年，所至均有聲譽，性謹飭，工詩古文辭。

吳傳紱字仲先，同治庚午由監生領順天鄉薦。光緒丙子成進士，以卽用知縣分發直隸，到省後因辦練餉功，直督李文忠保加同知銜。旋奉委統帶保陽軍，申明紀律，合境肅清。大吏嘉其能，特授棗強知縣。下車伊始，凡病民之規費悉罷除之。是時錢糧折價，縣官每視爲利藪，傳紱不欲多取，嘗曰：小民終歲勤苦



獲利幾何吾不忍民瘦而已獨肥也鄰縣河決溢入境被淹者數百村傳紱盡力籌賑災民皆賴以生時患蝗紱星夜赴鄉督民捕治不數日撲滅淨盡不爲災邑與東省接壤向爲盜藪居民惶恐不能安寢傳紱召集捕役指授方略嚴定賞罰皆願出其死搗毀巢穴有馬某者盜酋也紱遣捕購線緝獲置之法典自是他盜相戒不敢入平時折獄公平遇有疑案輒微服親訪務得其真相而後已故在任二年民無冤獄時論賢之十一年正月卒於任所年五十一卒之前一夕城隍廟祝暨合邑士民皆夢紱任本縣城隍發喪之日百姓痛哭失聲如喪考妣紳民合辭籲請將柩瘞縣治之西偏歲時致祭以報功德經家屬力

辭乃止

汪夢鯉字海春歲貢生燮儲子性敦介和易近人少丁喪亂讀書顛沛流離中一過目終身能記憶困棘園就教職歷官建德阜陽訓導當塗教諭委績溪以病未赴官建德時值縣試罷考爲解釋得復考如例官紳士庶均德之教士一以勵實學敦樸素爲主旨至表揚節孝培植寒畯日行事也嘗館廬江劉秉璋家秉璋時督四川有人謂久館可得官夢鯉漠然卒以親老辭去後同邑丁仁澤官清河禮致之居數月歸賦詩留別如老鶴云離襍未解投時好清潔由來得氣先可想見其生平矣舒霖字筱岩國學生幼讀書留心經世之學以巡檢晉知縣權

句容值旱勤督捕蝗避疾卒於官在官以愛民爲本而尤長於文牘例案凡巨大案牘人所不能解決者長官貴人多就其私第商榷之曾忠襄尤倚如左右手故疊疏薦之在如臯主簿任創立通州花布捐局在江寧典史任據成約阻外人購地在上官巡檢任代民呈邑令請減田賦又募穀萬餘石立借種當牛局以蘇民困故所至有聲後以功保至知府加花翎鹽運使銜子紹基字摯甫號養初國學生能文屢屈於布政司試從父官江蘇時淮徐海大飢飢民數萬人循淮河由袁浦下沿途索食食盡挈以行官民震恐大府稔紹基有幹濟才委經理振局事克舉累功保至道員留江蘇充報銷局兼支應局等差籌畫曲

當性和慎喜吟詠就所居植花本山石顏曰亟園公餘輒集一時名流酌酒賦詩泛論古今不及利祿事蓋幾類吏隱云著有固菴自詩草四卷人天清籟集詞一卷養初子筆記一卷行世舒士騫字味三亦字少笙父卓元見文苑士騫同治庚午舉人辛未考取咸安宮官學漢教習期滿以知縣分四川歷署安縣丹稜縣知縣合州知州授溫江縣知縣戊子丁酉充四川鄉試同考官合州有南津渡當嘉陵宕渠二江合流之衝盛夏水漲每因爭渡溺斃者踵相接士騫乃捐資立義渡嚴約束自是行人得無患每涖縣必以振文教勸農桑明聽斷詰奸宄爲事去之日民多立碑紀政蹟

夏先楫字肖巖舉人以大挑知縣需次浙江歷充浙省讞局帮審正審督審差性慈祥不妄刑訊每遇命盜重犯推誠相鞠人不忍欺署義烏縣懲除賭博其風大息捐廉建設倉廩儲穀千餘石又於佛堂上溪兩市集各儲穀七八百石民利賴之年餘以疾辭職歸田後經營葬事踰年卒生平無疾言遠色平易近人至辭受取與間則絲毫不苟云

陳吳萃號正鈞光緒乙酉拔貢丙戌廷試取一等二名以知縣籤分湖南歷治縣十所至有聲庚寅攝華容華容地窪瀕湖居民規水爭利忿勇械鬪仇殺動至數百人吳萃甫下車得主名係歷任訪拏未獲者不動聲色擒治之衆賊服明年調湘鄉有

無賴某以犯竊爲里人所懲大銜恨時會匪嘯聚江西萍鄉蔓延至醴陵僞爲貽賊書遺萍鄉防營列里人名十二誣與賊通吏上其事中丞密檄往捕逮至皆鄉里愿樸農民察其枉悉遣歸乙未署巴陵中日之役募沅溪民爲兵出關備征行次岳州和議成檄遣散回籍軍士大譁相率向統帥索餉發礮轟擊營帳城門晝閉居民爭相避道梗不通吳萃聞變馳往亂軍諭縣令輿從相避讓曰好官毋相累吳萃下車諭曰爾曹不過索餉銀作旅資耳且歸營伍毋陷大逆墊發餉銀數千事遂寢巴陵納正課舊例官徵官解尾欠卽於上忙春櫃帶徵後攝篆者頗難之改爲包徵包解於是利歸胥吏害在閭閻吳萃抵任後仍

行春櫃帶征歲比歉收稅不及額凡上解之款悉稱貸以應去  
任時士民知吳萃爲逋欠虧累爭請分遣胥役款門追呼吳萃  
不可曰勿擾吾民也遂止己亥調耒陽時蛟水爲災詣勘卽捐  
廉以賑辛丑履石門本任視事甫越月調湘鄉明年補授是邑  
爲吳萃舊治吏安其教民習其令捐廉設工藝廠兩次率諸生  
行鄉飲酒禮是以先後中丞如陳寶箴趙爾巽疊薦治行循良  
卓異甲辰徙署邵陽明年匪首劉綱領倡亂燄甚熾吳萃乃嚴  
保甲請兵往剿殲渠魁數人衆始散吳萃復督勇窮搜山谷時  
值隆冬蒙犯雨雪往返馳驅數百里困憊不支每獲一犯務窮  
鞫得實夜恒至四鼓不休其盡心民事類如此五月任長沙首

劇繁要號爲難治是冬適有瀏匪之變瀏邑界連縣境宵柝相  
聞軍書旁午縣境匪民乘勢搶劫遙相應吳萃舉辦鄉團得犯  
數名懲治得救平是年中丞龐公奏升補郴州直隸州復以論  
邵陽平匪功保知府在任候補並加花翎三品銜復因辦理匪  
案奏保補知府缺以道員選用丁未夏調署零陵因積勞致疾  
歿於任生平御衆以寬待人以實無厲色疾言聽訟尤平易近  
人勝者固有德色卽負者亦無怨詞感人者深故去思日永各  
縣聞訃均設靈追弔湘鄉耒陽邵陽三縣建立私祠至今猶春  
秋致祭云

甯彝訓字欽若任湖南武岡州知州勤政愛民循聲卓著充辰

州關統辦革除積弊廉介自持商民賴之予進士鵬南

陳錫純字葆初幼讀書敏悟嫻吟詠工書咸豐初投筆從軍歷佐戎幕湘淮軍將領多引重以功擢江蘇州牧同治初擢府丞時兵燹後井邑空虛爰招集流亡殫精瘁力在職三載多異政革除積弊不憚權貴廉直聞於朝旋以烏私陳請歸里時人咸高其襟韻恬退淡於宦情焉

吳震字墨園同治癸酉舉人沈默寡言造次必於儒者教諭婺源能以身爲表率諸生來謁輒諄諄以敦崇實學勉之掌教紫陽湖山兩書院尤有法得安定遺意後年老解組歸婺人士爲惜其去者久之

葛振峯字硯生諸生成豐間舉家避難直隸因官焉同治元年補定興縣典史性慈祥撫恤獄囚夏給湯藥冬給衣被逾常格同官每以善人稱之在任六年丁艱回籍遂不復出課子之餘日以詩碁消遣亦雅人深致也

馬繩武字松圃父良字南溪性溫厚見義勇爲繩武少穎悟讀書一目數行家貧不能自存入都供軍機處繕寫職庚午之變隨恭王贊助議和受知以正指揮外用知州任各邑皆有政聲擢天津府最爲李鴻章所信任遇中外交涉辦理適宜攝天津道權長蘆鹽運使整頓鹺綱力除弊政朝廷倚重將大用之遭母喪回籍蛟水爲災皖撫裕祿委督辦賑濟事以過勞卒於宿

松途次追贈光祿寺卿銜弟宗武字渭濱性恭儉兄弟五人居幼而孝行最著長四人以衣食餬口四方咸豐中值亂獨奉母居深山備歷艱險不以爲瘁事定其四兄官兵司馬正指揮宗武侍母入京遂出仕北河縣丞擢知縣升任奉天同知清日之戰設備周密民賴以安調任金州俄租界在境內俄人強使就職弗就執之去囚於海參歲不屈乃釋歸海升知府道員用加二品頂戴鹽運使銜籌策防河卒於通江

吳濬字哲夫一字喆甫幼聰慧年二十登黌序越年補廩膳生光緒乙酉丙戌聯捷成進士授職主事簽分戶部浙江司行走光緒十五年充出使日美頭等參贊官調充秘魯參贊官兼辦

秘魯使臣事向者美舉總統國輒不靖華人僑居因受損失濬至彼適遭改選之會乃翁商各國公使與美秘魯智利外交官締結條約共相保護自時厥後華人一如各國僑寓者受特別優待利益均霑焉三年瓜代瀕行時華僑依戀如失父母叱沙環登拿亞叻架散爹惠愛基必灣散爹告橫巴黎素等埠商民至歌述功德紀之牌扁追送海濱以視古之留犍截鞞臥轍攀轅者殆有過之內渡歸國將入都順道省母旋丁母憂盡哀盡禮二十二年服闋赴京陛見賞道員晉二品銜分發四川到省總辦洋務局事余蠻子教案起躬往開導卽就平復二十四年權稅合州商不病而課自溢二十六年權建昌兵備道名山大

邑兩縣民教相仇聯衆萬餘焚焜教堂釁成國際濬當之不激不隨折衝尊俎卒不戮一人不黜一官而司鐸心折民教相安如無事然二十年交卸道篆回省仍縮洋務局事時皖江大水廣濟圩潰鄉人馳書濬先籌墊四萬金以救災民並捐募巨款賡續其後振餘卽助成皖義渡局事鄉人至今僣道不衰二十八年川東鑛務案又作大吏將委權川東道俾處置其事奉命卽行單舸東下屏絕供張不驚屬吏行至江津歿於舟次蜀人哀之立祠江頭歲奉其祀其德澤及人之深猶如使秘魯時也葛振元字義乾世有潛德祖啟俊父高新均自有傳振元幼有異稟目光夜能辨物稍長善屬文兼精醫讀書日數行下家貧

意豁達光緒壬辰以庶常散館授湖北保康縣知縣素富智略知兵爲宿將曹軍門克忠所倚重嘗周歷秦隴巴蜀粵東山川阨塞具悉天下郡國利病吏治得失旣爲令駿厲風發燭奸起廢羣詭爲神在任三月邑境稱治調沔陽房縣皆僅一年去時士民率數百千羣集遮道焚香歎息久之雖爲所懲創者亦相與興感愧厲沔陽有豪民劫人女爲婦鞠之不肯服立命取時憲書示之曰是日不宜嫁娶汝爲子娶何耶卽叩頭請治罪所至案無留牘嘗詔其子聽訟以延累不結爲大戒每政暇以文詩課士遇善類扶植惟恐不及素精藻鑑癸巳充湖北鄉試同考官稱得士卒於官年四十有七振元性至孝事繼母雖嚴斥

必委曲博歡早歲豪俠任郵每書院課試得高等膏獎率以散之戚族貧無依者通籍後交遊徧海內累舉債赴友朋之急而里中待以舉火者至十數家昏喪諸事皆力任之未嘗有德色卒時至貧無以爲殮張制軍之洞爲措千金始扶柩返里子三長其廉季共皆早卒其廉舉人醇美好學有文名共年十三四卽好醫術治家人病輒效嘗自言遇異人諷以出世飄然有塵外之思年十六游學申浦從日人綿貫習西醫旋復就學日本在校年餘數理卽通習微積手纂精要至五六十冊以攻苦太過病咯血卒年十九臨終神氣澹定若有夙悟者吟詩一絕而逝有遺詩一冊藏於家

夏先煊字冶爐廩貢生父芾財雄一鄉先煊弱冠能文布衣蔬食無紈袴氣咸豐初以知縣需次湖北時孝感創辦釐局軍事方亟商民多畏避不前先煊至設法招徠不病商而國課裕旋署隨州知州修城隍以資守禦興團練以足軍實聯保甲以弭盜賊勤撫字以培元氣嘗有賊數千人突至城下先煊登陴固守日以忠義感激民兵相持數日夜而官軍適至得無恙

陳衍庶字昔凡從三兄衍中學中乙亥鄉試舉人以知縣治河有功保直隸州歷署軍糧同知懷德柳河等縣事授遼陽州尋升鳳凰廳以知府賞戴花翎權新民府擢道員在官惠政以柳河最著柳河固新設治凡創建一出其手念柳民苦轉輸爲籌



鉅款并蠲廉設局以貸行十餘年無弊嘗從欽使某公放荒產  
隨轅司案牘一晝夜理訟卷三百餘件悉得民隱歸於邑南偏  
購小園置花木以自娛接見里人如山林逸老幾不知其曾爲  
顯官者工書畫以鄧石如劉石菴王石谷沈石田四先生爲師  
自顏其居曰四石師齋又自號石門湖叟弄藏前賢眞蹟古玩  
甚富每陳列璀璨盈室友朋來觀留連不肯去或假歸一二絕  
無吝色平生最心折同邑姜筠謂當時畫家無出其右者餘子  
不欲下之晚年朝夕習漢隸書益大進得者珍如拱璧尤喜獎  
掖後進於潘勗篆刻蕭愨畫稱譽不去口長兄衍蕃值亂父章  
旭挈之從戎後入楊厚菴宮保幕頗倚任疏保直隸州以知府  
用旋歸移家東流竟傷於賊而病卒

陳樹涵字筱珊父崧死於賊見忠義傳家貧刻苦力學以拔萃  
與鄉舉就知縣需次江蘇蒞事勤敏時通州張殿撰興實業  
於海濱規闢區海濱民竈雜居又有蘇狼營地交錯其內糾  
紛不可究詰樹涵窮數月之力周歷曉譬口瘃足疲得劃然理  
解權鹽城事鹽城濱海饒魚鹽之利俗侈民情盜賊恒出沒其  
間樹涵下車勤聽斷嚴緝捕民輕滑通盜者遇案痛繩之盜賊  
屏跡以其暇興學校勸農勸工場以教游民萃中西新法編  
農學淺說刊布民間俗爲大變邑舊有泰山寺擁貲累鉅萬寺  
僧勾結豪猾爲姦利邑人苦之會以事逮案從紳民之請廢寺

爲校寺僧姦豪百端搖惑卒不爲動以治行卓著調署上元力矯趨承上官之習年餘再調興化興化故與鹽城接壤一以治鹽城者治之未幾以道員調查三省礦政會恩忠愍撫院調歸董皖南墾政殫力經營未竣而卒年六十有一歸里後出薪資所積創建念劬學校於三橋鎮教族里中秀而貧者先後生徒數百人所費萬餘金大吏爲請獎於朝輒辭不受至今校中猶守其遺規云

丁樹屏號建侯舉人弱冠後幕遊兩粵爲李瀚章制軍所器重嗣以公車屢躓就知縣官直隸攝容城篆甫下車訪求民間疾苦遇邑之正紳則禮而賓之於刁生劣監則屏絕不齒容民素

健訟每告期案凡數十起樹屏隨閱隨判廉得其情維時新政甫在萌芽樹屏首先提倡舉凡學校農田警察團防諸善政一一備舉解組之日容民感其德爲立去思碑以矢弗諼云

葉元琦字紹韓幼穎異狀貌偉然讀史漢過目成誦八試北闈屢薦屢黜晏如也父伯英撫陝時祖坤厚年益高元琦留汴侍養能得其歡又時時省父往返數千里戊子己丑間父祖相繼卽世元琦扶櫬歸皖躬自跋涉尋兆域至患蹊盤終其身初入刑部爲郎以湖北道員平新疆功保候補班前先加三品銜尋賞花翎改官直隸歷任天津海防營務處保定營務處兼練餉局一遵父伯英在局時築雉鉤稽精當胥吏無能爲奸丁母憂

服闋仍司餉局庚子拳匪起爲陳進兵策於護督極言邊衅不可開邪說不可信亂民不足恃不報時各國藉口靖難合兵犯天津元琦知事急欲移庫儲內地未果而天津京師連陷萬乘西狩各國將耀兵保定當軸倉皇失措遂亟請於護督竭晝夜力運出帑金四十萬而敵兵已入城矣方大難初起盜賊充斥元琦挾輜重涉長途人心岌岌僚佐無敢從者會計文牘兼於一身漏三四下猶不寐兩閱月始抵大名朝旨命遣散振遠軍元琦較量遠近籌給行糧士卒各厭其意以去護餉振遠先鋒某驕蹇饕餮請截留五萬金以饗士元琦燭其奸峻拒之遽劫以兵變元琦不爲動某計沮而其軍亦卒不亂旣裁振遠軍各

軍之就食日益衆措拄十閱月饗盡而敵軍亦離保定易危爲安時論以此多之會和議已就才雋多得志而元琦獨鬱邑佗際無所合竟遘疾以卒年五十有四大府追念其功聞於朝贈太常寺卿蔭一子入監讀書生平喜研究時務嘗請李文忠開東文學堂詳訂西書嘉惠士林又於公餘自輯各國風俗政治成書名曰共球集要

丁堂字得春號鑑湖由京兆議叙初任江寧貳尹大計卓異歷任高淳溧水宿遷上元等縣高郵州牧淮安府別駕兼能惠愛所至歌來暮嘗閱簿書終宵不寢夫人問故答曰囚之生死懸州縣手吾反復細核於死中求生耳卽不得吾盡吾心而已以

故平反甚多宰上元時除夕無度歲資至初更傾篋搜舊衣入質庫市酒米其清苦率類此高宗數南巡差徭繁重堂以拙於催科負累甚鉅籍其旅寓無所得復籍原籍僅紡績具舊什物而已卒年八十有一著有雲臺詩草若干卷集陸雜詠四卷庭訓彙存一編行世

馬驥字靖坡少負奇氣遊京師入成均以議叙官湖北署梅邱巡檢擢知縣治崇陽武昌建始崇陽多岡阜山水漲田廬屢浸與鄰縣蒲圻令倡爲疏渠入河之議築堤禦之民賴以安武昌經兵燹鮮蓋藏集衆資糴穀分鄉建倉以儲是爲武昌社倉之始權建始時改新政忤巡撫端方意告歸年七十有九矣生平

寡言笑性介不輕取與自奉儉若寒素晚年以圍棋自娛嗜種植經營園林尤弗倦

方炳奎號月樵咸豐辛亥壬子聯捷成進士歷宰靈壽晉州靜海等州縣能以文章飾吏治庚申卸北河篆明年春出守平樂典郡六年民和歲稔嘗就郡西昭山築一亭擅江山之勝額曰蒼然自紀以詩比之醉翁亭可想見其政之成焉先是炳奎少孤貧母節而賢晝則令之拾薪江干夜則授之讀讀倦必嚴督無貸稍長爲擇族中老名士壯猷教之及炳奎貴列仕籍猶時時以正誼明道相勗故炳奎服官十餘年未嘗一日不兢兢自守皆遵母教不敢忘也著有中穩堂詩八卷行世詩格調清蒼

蓋得力於壯猷爲多云

魯說號肖巖光緒丙子舉人磊落光明素有經世之志橐筆走十餘省間爲人權記室所至留心世務又徧交當世賢豪以相與講求有用之學如是者垂十年丙戌李傅相鴻章委辦海軍糧台在營踰年上而將領下而士卒莫不稱其賢戊子豫撫吳大澂調赴豫工購料佳而費省河患以平壬辰隨李欽使經方東渡日本贊助外交事宜悉能得體李使深相依畀嘆爲通才丙辰以知府需次福建制府下寶第引爲幕賓俾襄要政方將重用秋九月遽以疾終素志未酬海內士大夫同聲哀之宣冠璜字礎士十二能屬文稍長肆力於經世學同治初六安

李采臣官山東臬司旋擢藩司晉巡撫冠璜居其幕中凡十年援例爲鹽大使發山東癸酉與賈莊堵口之役以勞保補缺後以知縣用光緒庚子署青州王家岡場大使先是永阜灘池沒於水大吏奏請於此場增開新灘以濟不足一時商民曰爲利藪輦金鑿之踰三倍由是產鹽日富而銷路日塞有積之十年不售者冠璜廉其情推求鹽法陳其狀於上官請破陳例凡商家有越其本場定額而溢銷者則當以此場先之且請著爲例商困以解其明年秋九月黃河決歷城下游分溜東趨挾小清河而漫入場境東北之十餘庄皆場屬也冠璜聞報卽馳往見災民或拊樹或緣墻登屋或羣集於小阜老弱號啕哀聲震

野急命以舟濟之復就高曠處結爲席棚以蔽風雨又設廠爲粥與餅以賑之民獲乂安旋署蒲台永利各場大使其善政多類是

甯鵬南字翼雲性篤厚事父母至孝年十六一試而取青衿癸巳舉孝廉戊戌成進士簽分工部主事供職勤慎庚子兩宮西狩奔赴行在不避艱險事平以親老截取知縣分發湖北俾便奉養充鄉試同考官得士稱勝

楊繼忠字蓋臣附生父懷清見篤行繼忠以府經歷需次浙江海運功得保知縣晉直隸州知州加知府銜曾充督練公所教練處書記官於軍學深有研究宣統三年八月武昌事起繼忠

總理甯波府軍械局甯波民氣素強悍蠢蠢欲動繼忠商之軍政兩界力與維持地方賴以安靜事竟以疾辭歸後二年卒甯波紳民至今尸祝之

章蘭蓀字畹叔號香谷諸生少好學會赴日本習警察有聞於時回國值新設民政部奏調授小京官於部務多建白稱能員晉主事復以辦理欽皇后及德宗大喪升員外郎入民國攷取知事將分發卒性穎慧能詩所作多不存稿賚志以歿時論惜之

胡煊字暉之性仁厚似父椿有乞貸輒與無吝容人稱爲長者以縣丞充張家口墾務委員清勤不阿總辦某公之戚陳吏目

與共事以不便已讒害百端無所得卒以是見重於總辦保授鳳凰直隸廳經歷以知縣在任候補裁汰陋規撫卹獄犯至今感泣嘗爲廳審判力爭冤民數案得不死廳倚賴至如左右手書宗顏魯公得其筆法喜吟詠篆刻善堪輿精命理自謂年四十左右宜死竟驗國變罷歸積累至千金親向借主書券付之越二年借主道過皖尋訪而煇已卒撫棺慟哭盛稱其賢同母昆弟七人次兄遠芳性至孝既娶猶依依母室亦早卒母哭之過哀謂先意承志獨得我心煇庶幾次之

以上  
文職

江山定字君寵少攻舉業未幾棄去曰丈夫當垂勳名竹帛安能效章句儒呻吟老死牖下哉於是縱觀兵家言習弓矢決拾

與武人相馳逐明季流寇蠡起地方率藉鄉團爲衛山定勇而有謀鄉里賴焉乙酉左師陷城時山定外出家屬困鋒鏑中將投水以殉適山定歸於馬上揮刃護之送於城外三十里仍匹馬入城里中賴以拔出者無算蘇撫屠某聞其名擢參將鎮守崇明以備倭山定內修外攘威名遠著萑苻斂迹軍民戴之補王斌字憲伯先世遼東人占籍懷寧順治乙酉從豫藩征吳楚南粵間屢立戰功給都司劄時徽饒英霍賊蜂起鎮標兵失利斌往援爲前鋒賊平授千總十二年海寇犯京口委斌爲十三營總統駐圖山三戰三捷十三年海寇趨皖犯桐城斌假八旗舊幟前驅大呼滿兵至賊驚遁追至六安斬其渠授拜他喇布

勒哈番註安慶衛準襲二次旋以遊擊管常營守備事卒

楊廷試字殿卿襲補安慶衛守備督漕有功題署眞州守備眞固重地兵民商賈五方雜處廷試撫馭有道眞人誦之以年臺乞休歸

邵嘉賓字子雋中康熙癸卯武鄉試乙卯春任福建海澄中軍守備時海賊大至海澄陷嘉賓矢盡援絕被執乘間得逸出絕山踰嶺七晝夜達王師尋隨大兵進剿復海澄漳廈等地論功晉秩左都督實補浙督左營守備缺裁復補山東壽張中營守備

馬大用字萬宜姿容瑰偉讀列代名臣傳慨然自負於象占兵法靡不涉獵又善挽強弩發輒中的雍正丁未中武會試第三人補二等侍衛授陝西火器營參將署花馬池副將歲比饑饉整輯營伍民賴以安屢辦邊外軍需帷帳騾馬夙具乾隆二年除波羅協改川陝中協丁內艱歸服闋補黃州旋調沅州沅故民苗錯處苗特獷悍多占民田大用結以恩信單騎入寨峒反復開諭苗大感悟爲出民田數千畝十二年擢宜昌鎮總兵十六年轉漳州鎮兼都督僉事時逆匪蔡榮祖煽惑愚民謀爲不軌發有日矣大用預選精騎數百夜馳二百里天未曉入賊巢渠魁就縛餘孽悉剪事聞上嘉悅賞戴花翎十八年移鎮臺灣臺俗淫侈時進諸父老於庭與以酒食懇切激厲於是舊習一



變甲戌風災沿海船艘漂沒大用親涉鹿耳門指揮泗水諸軍  
撈救共四千餘人淹斃者施棺掩瘞時疾疫盛行廣給醫藥督  
備弁視其起居全活無算二十一年調粵潮入對稱旨旋擢福  
建水師提督駐節廈門內捍全閩外通各島濱海不法居民往  
往嘯聚海上劫殺官吏大用練水軍修戰艦築礮臺杜接濟殲  
渠解從終其任四境無援桴之警二十四年以病乞休上傳諭  
慰留疏再上許解任食原品俸尋卒年六十二訃聞上憫悼諭  
祭葬予賻卹諡曰慎愨大用性廉謹一切苞苴不受廉俸所入  
分潤里黨己則衣經補綴食不重肉與僚屬言必先忠孝節義  
所蒞之處每損資設立義學勸弁兵子弟讀書軍中多絃誦聲

### 焉子家良自有傳

王惠字惕存中康熙癸巳武會試任浙江處州衛守備裁革陋  
規二千餘金修海塘功成制府奏請超擢命下而卒初惠末第  
時路拾遺金五十坐守達旦還失金者追會試墮馬復上發皆  
中的或以隱德所致也少工詩著有柘澗山房詩草

葉林春潛山營外委嘉慶元年從征湖北孝感縣教匪攻克四  
方台等處十餘戰多上首功准投千總旋因傷病歿卹白金三

十兩廕子森七品監生

以上前志江  
爾維分纂

趙冠英居堯年鄉粵逆之亂隨楚軍征戰咸豐十年保授把總  
賞戴藍翎是年八月克復桐城回勦安慶援賊收復宿松黃梅

廣濟等處保千總加守備銜同治元年克復廬州衝鋒陷陣卓著戰功督辦陝西軍務荊州將軍多隆阿奏保換花翎以守備用五月隨軍援陝獲全捷保都司二年攻大荔縣王閣村羌白鎮回匪巢穴大獲全勝保遊擊三年攻陝蘇家溝渭城灣花花廟等處回巢並解鳳翔府縣城圍總統荊州將軍穆圖善奏保參將加副將銜四年進剿甘肅攻黑城子賊巢克復鹽茶廳城肅靜邊境幫辦甘肅軍務提督雷正綰奏保交軍機處記名遇有總兵缺出請旨簡放冠英總理營務動協機宜籌餉足食有濟無擾民仰之如長城戴之如父母以同治五年九月沒於鹽茶軍次士庶哀悼立德政碑頌之謂既兼文武實備才德拯民

水火化盜爲良民沒世不忘云

以上同治志  
馬徵慶分纂

朱明善字新吾同治元年投效銘軍三年隨軍克湖州杭州廣德等城四年航海援閩五年攻湖北黃陂等處七年擊賊山東曹縣安邱濰縣及湖北黃安紫坪埠均與焉又在江蘇贛榆戰斃逆首十三年隨隊渡臺剿服番社立功之地凡七省躬戰事者十有四年大府保奏累官至揚州遊擊其身受刀創彈創凡數處惟右臂創尤甚蓋營中飛彈自以指剜而擲之地戰如故以故終其身右臂拳如弗能伸也

徐鷗字清泉秉性忠孝幼有大志痛母殉難誓以殺賊自効咸豐三年從袁端敏公討苗捻迭克鳳陽廬州六安泗州定遠各

府州縣且於糧斷援絕時困守蒙城厥功尤偉特授甘肅靈州營參將擢貴州清江協副將記名總兵給強勇巴圖魯名號後喬勤恪公奏調壽春總理全省營務兼攝鎮篆以擒斬僞首李允巨匪董倫補授河南歸德鎮總兵以提督記名並換額騰額巴圖魯名號會英果敏撫皖奏留公統領長淮水師積勞成疾卒於壽春營次年四十有三喪聞天子震悼議卹遣官臨祭命從祀喬勤恪公祠蔭一子錄用三子士信優廩生性誠厚有文名以直隸候補知州遊宦於新疆竟客死

徐士衡字叔平以父兄死賊襲雲騎尉初隨袁端敏調赴宿州大營轉戰淮南北岸力守滁州克復臨淮定遠等城歷署奇兵

泰州等營游擊六安參將同治五年奉喬勤恪檄帶盛字營兼管壽防馬隊時悍賊王廷用負固死守慶戰一日夜右臂受傷卒克賊圩擒渠魁散其餘黨光緒八年奉護撫盧士杰檄帶練軍前營十六年合肥土匪劉廷弼糾衆起事率隊往勦隨卽撲滅皖撫沈秉成以戰功卓越保薦總兵十八年署皖南鎮總兵條陳鄉約保甲緝捕三事新舊盜劫積案十數起次第拿獲在軍以重巡防嚴紀律汰老弱勤訓練爲事尤勤恤民隱曾上書曾文正請改營勇緝私費給牛種以蘇民生文正嘉納之軍中未嘗廢書每晚必危坐讀大學數周日以爲常論者以爲有儒將風卒於官附祀袁端敏祠

陳光全字裕昆同光間積功加參將銜賞戴花翎兩江儘先補用遊擊授青村營都司時梟匪縱橫往往嘯聚數百人聯絡數十艇以販私鹽爲名肆行搶掠官軍玩愒無能爲商民苦之光全始在蘇創辦緝捕營造飛划船製連環鎗及連矢弩直擣匪巢大小數十戰禽薙渠魁略盡繼在浙統帶緝捕營巡海至鹿苑遇匪首張嘉麟戰一晝夜斃之匪黨被擊多死傷餘衆潰散獲匪艇數十艘私鹽軍械不可勝計後又統領水陸等營仍節制江浙緝捕營整頓營規不遺餘力營弁王康南私通鹽匪卽按軍令正法匪首譚老天戴老天董必富董必貴等皆向來所不易捕而漏網者亦復陸續就擒永除後患光全自行伍起家

游升統帥治軍有方而尤以緝私捕匪稱最前後數十年爲曾國藩李鴻章左宗棠曾國荃張之洞諸大府所倚重江浙商民至今猶謳思之弟經友少業儒嘗割股以療生母之疾隨兄光全宦遊江浙改就武職歷充巡官有聲

姬文柱由行伍歷官安徽撫標右營千總潁州六安徽州等營守備池州營都司賞戴花翎性孝友母病刲臂和藥以進教養諸姪一如己子居官尤鎮靜在六安廬州役與營兵構衅幾宣戰柱直入片言解散劉文弼起事廬六接壤居民惶惑柱籌備守具城賴以安駐徽州時江浙客民在屯溪因事械鬪聚衆數萬人約次日大鬪闔鎮閉市柱星夜帶兵馳往擒其首要解其

脅從禍立止闔鎮至今猶尸祝之

胡愷字西園咸豐洪楊之變父蘊山被擄愷乞以身代義釋之未幾大股復至蘊山及於難愷乃集鄉里戚友百餘人投効合肥張樹聲建樹軍營克復湖州長興廣德漳州漳浦各府州縣並晟舍泗安等鎮授樹軍營統領以身受鎗傷右臂尤甚奉旨著免騎射同治年間勦平張總愚逆捻全股肅清疊保副將加花翎總兵銜並捷勇巴圖魯勇號奏留兩廣補用光緒八年署兩廣督中協鎮待士寬猛相濟辦崇聖義塾以造就青年創濟平局使無賴者得借本營業全活實夥旋以母年九旬告終養歸離任時祖餞者焚香遮道幾不能去母病衣不解帶侍湯藥

逾兼旬不倦庚子浙撫劉樹堂奏調留浙省補用委帶浙西水師巡察軍所入廉俸悉爲善舉及解推親友之用二十九年解組歸於學堂善局均各有捐助人多義之

以上武職胡遠濬孫緒郝秀觀分纂

This is a high-contrast scan of a ledger page. On the left side, there is a vertical line that serves as a margin. To the right of this margin is a rectangular area enclosed by a double-line border. Inside this rectangle, there are ten vertical lines that create ten columns of varying widths. Only the top row of this table is visible, and it is currently empty. On the far right edge of the page, there are two small, dark, horizontal marks that appear to be staple or hole punches. The rest of the page is blank white space.

